


帶經堂集

~~6888~~

12224



deli 浙字02260122号 No.6230 得力集团有限公司

十

帶經堂集卷四十三



歙門人程哲校編

懷清園移交黃蘗秋書

810.72
W238
V9

6888

12224

103051

帶經堂集卷四十三

漁洋文五傳

劉孔和王遵坦傳

劉孔和字節之長山人故明大學士青岳先生鴻
 訓子先生天啓中以忤璫罷崇禎元年以少詹事
 起田間與錢龍錫等五人同入相數為上分別白
 黑甚力闡黨忌之居無何惠安伯張慶臻事起羣
 小媒孽竟謫戍雁門以死孔和少儻好談兵慕
 陳亮辛棄疾之為人文章豪邁洞達詩尤奇恣崇



歙門人程哲校編
 新城王士禛贈上



懷清園移交黃蘗秋書

漁洋集卷五傳

禎末流賊自豫復入秦而太宗兵自喜峰口牆
子嶺諸路南下兩薄畿輔連破齊魯諸郡縣孔和
見天下已亂散財結客陰養死士山東河北輕俠
皆歸之甲申三月賊陷京師賊權將軍某據濟南
郡縣皆偽署官吏孔和部勒賓客激以忠義皆涕
泣距躍願殺賊為故君報仇於是椎牛饗士起兵
長白山中有衆三千人執偽縣令狗於衆誅之傳
檄旁縣所禽戮偽令數人及聞天兵入關破賊孔
和遂率衆南下過青州欲挾衡王俱南王不可孔
和痛哭辭去抵淮駐軍黃河北是時曹州人劉澤

清以東平伯開藩淮上陰忌其強令客說之使以

和痛哭辭去抵淮駐軍黃河北是時曹州人劉澤清以東平伯開藩淮上陰忌其強令客說之使以兵屬焉孔和貴公子性疎放謂澤清鄉里雅故屢恃舊恩狎侮澤清積不堪且稍憚其威名陰欲圖之澤清武人不知書既貴為藩鎮好為詩往往詫示坐客一日高會酒酣出詩示客次至孔和孔和擲不示大言曰國家舉淮東千里付足下今敵騎旦暮飲江淮未聞北向發一矢而沾沾言詩詩即工何益國事況不必工耶澤清被酒大恚推案起一座震懾不知所為孔和不為動拂衣徐出澤清益不平立遣壯士二十輩追及舟中拉殺之一軍

大譁散歸孔和時年三十一已而金陵命下以為
副總兵官則孔和死三日矣孔和長八尺面目如
刻畫雙目炯炯射人如電望之類羽人劍客平居
好論天下大計感激憤發鬚顙怒張嘗賦詩云并
無殺者黃江夏豈有食之嚴鄭公後竟死澤清手
蓋讖云所著日損堂詩集練要堂文集各若干卷
多可傳

王遵坦益都人太僕少卿滌之子長身少鬚眉狀
類寺人跌宕負奇好飲酒擊劍父滌失勢家居無
日不飲酒叔父衮才而數奇亦跣跣放於酒每飲

酒輒呼遵坦與俱各盡數石酒酣相與賦詩大歌

日不飲酒叔父衮才而數奇亦跣跣放於酒每飲
酒輒呼遵坦與俱各盡數石酒酣相與賦詩大歌
呼為樂客至輒不得通顧獨與孔和交善遵坦別
業在家桑谷山水幽奇數與孔和遊止賦詩或屏
人促膝畫地語終日人莫測也王贈劉詩曰驢脊
如柴少韉勒小挫風期非我曹劉亦贈王云何似
冉家好兄弟同心畫出釣魚山齊人皆目笑之以
為狂生南渡後遵坦為總兵官亦隸劉澤清孔和
死遵坦懼禍及跳身北走至京師上書獲錄用
肅王入蜀以遵坦從既定川北即署遵坦都御史
巡撫四川尋病死保寧

論曰陳同父有言亂離戰爭之際往往奇才輩出
 故述龍可趙九齡事至潛溪先生著秦士錄豪宕
 感激至今想見其人明之末造海內罹兵革者數
 十年深山大澤豪傑不乏如孔和遵坦輩不有陳
 宋之紀述烏能自見於後世哉

任民育楊定國傳

任民育字厚生濟寧州人居泗水上家世業農民
 育始讀書為儒年二十六補諸生中天啓甲子解
 試民育雖書生居嘗倣儻好奇計崇禎戊寅牆子
 路之警言總河侍郎周鼎北援臨清以運判馮元颺

署濟寧道事城守雅知民育引參軍事會閹人高

路之警總河侍郎周鼎北援臨清以運判馮元颺
署濟寧道事城守雅知民育引參軍事會閹人高
起潛軍至所部丁志祥縱兵大掠元颺捕斬數人
起潛大恚責取濟寧不用援兵狀元颺以問民育
決計與之濟寧以安壬午天兵再下山東及濟寧
民育城守益力遂去而攻充當路知民育有將帥
才於是淮撫史可法以通州請保撫徐標以監軍
請吏部碁之授潁州知州潁數被兵民多保聚人
自爲守民育至更團結部署身任師帥兵事之隙
問民疾苦三月潁大治甲申流寇犯闕鳳督馬士
英南奔民育輿櫬於庭集衆誓死守金陵建國史

育不可飲刃死揚人聞之皆泣下先一日星隕於
署櫪馬皆驚民育自分必死散遣諸妾惟寡女適
劉氏者與一女留署中至是俱縊死幕客陳美僕
聞道等五人皆從死妾姚氏本揚人投水死三子
鍾華鍾蘭鍾崧走匿民間得免

楊定國亦濟寧人遠祖浩成化中為太學生會帝
幸佛寺浩遮道上書諫帝嘉納即為回輦由是名
聞天下歷官至都御史定國少補州學生甲申

本朝定鼎以戶部侍郎王鰲永招撫山東檄至濟
寧士大夫議歸附定國棄其家附舟南下趣金陵
依故濟守王孫蕃孫蕃是時為御史用事未幾孫

蕃出按江西寄家杭州定國從之杭金陵不守天
兵徇浙西潞王迎降魯王監國於越畫江而守定
國杖策渡江上謁授行人司行人未幾江上師潰
定國一夕呼酒痛飲闔戶雉經以死貧不能歸葬
其子某殯於僧寺

王士禛曰予以順治庚子理揚州士大夫為予述
民育事甚烈民育畢命處在太守廳事西偏血凝
碧陰雨猶髣髴可見時距其死十六年矣會修郡
誌民育死節事略而不書予懼其無傳也得楊諭
德士聰所述任揚州始末略之為傳定國與民育

生同里先後死義因牽連書之

德士聰所述任揚州始末略之為傳定國與民育
生同里先後死義因牽連書之

少司徒焦公傳

公諱毓瑞字輯五別字石虹姓焦氏其先棗強人
始祖成永樂中徙章丘之清平鄉大王父瑁贈都
御史王父馨萬曆辛丑進士巡撫寧夏都察院右
副都御史卒贈工部左侍郎考日芬建昌府推官
贈太僕寺卿妣張贈夫人初中丞公為大名監司
公生於官舍幼不好嬉戲動中規矩讀書目十行
下章丘令南皮湯君號知人一見器之曰公輔材
也順治丙戌秋復行鄉試舉東省明年丁亥舉禮

部已丑釋褐改國史院庶吉士辛卯授廣東道監察御史壬辰奉命巡視京通二倉爬梳夙弊奸胥繁息世祖章皇帝駐蹕通州公朝行在特賜貂裘蟒服故事非閣部大臣不得賜蓋異數云癸巳被命巡按宣大兼理學政雲中當姜瓖畔逆之後人心艱脆公至招流冗嚴保甲課農桑葺學校勤考課修城浚池存問孤寡邊人誦之未及瓜而撤差之旨下士民泣送者百里不絕丙申巡視河東鹽政舊例每包以鹽二百斤為率踰額罪及商賈公為酌定成規不贏不縮商民便之在事

一載苞苴不行歸裝惟襤被圖書而已尋宅父憂

及商賈公為酌定成規不贏不縮商民便之在事
一載苞苴不行歸裝惟襍被圖書而已尋宅父憂
庚子補雲南道御史辛丑今上御極遂掌河南
道事癸卯內陞公在臺首尾十三年凡所建白務
存國體不谿刻近名不黨同伐異然邪正是非之
介持之毅然亡所鯁避上以是信公孤立無黨
援其受知兩朝蓋以此需次歸侍太夫人子舍
凡八年而太夫人歿癸丑起田間用新例借補廣
西道御史尋陞太常寺少卿進通政使司左通政
甲寅進太僕寺卿戊午進太常寺卿己未進通政
使司通政使會京察一日奏事畢上召公至御

座側親詢屬員甲乙次第公奏對稱 旨 上霽
顏顧閣臣曰焦某敷奏詳明可稱老成練達自是
受知益深未幾擢都察院左副都御史尋進刑部
右侍郎矜慎庶獄每九卿會議朝堂公言必盡終
無所依違太湖縣民因事行財法司擬以授受同
科律應死公獨曰受者百二十金乃為滿貫以授
者分計三人各四十金法止杖耳律云皆計所得
是其證也奏請得末減遂為定例 皇陵栽柏人
三十三人賂部胥七百金法司擬滿貫律當死公
援前例力爭亦得末減山東饑高苑民十三人持

囊橐向大姓索糧有司以盜論傅大辟公謂是不

援前例力爭亦得未減山東饑高苑民十三人持
囊橐向大姓索糧有司以盜論傅大辟公謂是不
過饑民冀緩須臾之死囊橐豈兵杖耶左都御史
蔚州魏公是公議竟從寬典先是官司寇者端毅
龔公之博大端恪姚公之績密爲朝論所推時以
公爲無愧奉 特旨調兵部右侍郎知貢舉轉左
侍郎淮安有商三十三人舟自廟灣趨膠州遇颶
風引至朝鮮執送京師議者謂犯禁通海應下西
曹其人辨言有官給照票墮水失去公議行查淮
安將弁有無給照事立辨竟送法司罪難釋矣已
而巡撫咨覆實給照事遂得白其所平反率此類

也秋 賜宴西苑頒賚表裏凌蕩其冬雲南平壬

戌上元 賜宴乾清宮 上手金卮賜酒 詔賦

柏梁體詩公有天河洗甲通蠻鄉之句二月奉

命告祭太昊諸陵癸亥上元復 賜宴乾清宮賜

綵緞滇馬甲子戶部侍郎缺 上特諭吏部焦某

操守可嘉可戶部公自司寇移佐司馬自司馬移

佐司徒皆出 特簡廷臣亾與比然食少事多未

幾而病作予在成均日嘗從容為公言山居甚適

公以方在中樞兵事旁午不敢輒引退既屢被知

遇程書衡石日夕况瘁益不敢言洗沐以死勤事

未及遂初非公志也公外和中介人不可得而親

遇程書衡石日夕況瘁益不敢言洗沐以死勤事
未及遂初非公志也公外和中介人不可得而親
疎廷議侃侃視首鼠持兩端者若將浼焉諸公卿
或有異同卒折而從公則公至誠有以感之也使
公無死旦晚且枋用然清白聞於主上至誠信
於同列其用雖未究亦可以無憾矣公居家孝友
為德於鄉黨宗族甚衆不具論論其立朝之大者
論曰漢郭躬陳寵皆世習律令為法名家躬斷秦
彭之獄寵罷鈇鑕之刑其慶延於世有以也焦公
儒者法家非所好然觀廷議數大獄務依矜恕不
力求其生不已雖陳郭何加焉今國家重經術絀

文法公又以德望結主知方佐致太平而天不
憖遺忽焉以歿惜哉

孝靖顏先生傳

先生諱伯璟士瑩其字復聖六十六代孫世居曲阜父肩紹明崇禎辛未進士歷官河間府知府有子三人先生其長也次伯玠次伯珣先生生有異稟狀貌偉麗讀書不屑章句談古人忠孝事輒感激奮發河間公令鳳陽令江都令邯鄲每以先生從時天下已亂軍書旁午郡縣吏日不暇給先生侍其父凡所區畫多中機宜河間公以守邯鄲功

累遷知河間府會王師入關薄畿輔河間孤城無

侍其父凡所區畫多中機宜河間公以守邯鄲功
累遷知河間府會王師入關薄畿輔河間孤城無
援公衣冠北嚮再拜集家人一室中而自登陴力
守城破急趣歸署闔門舉火自焚死時先生獨與
仲弟伯玠居兗郡道阻不相聞未幾兗亦陷先生
方與弟乘城守禦兵入守者皆潰先生體肥行不
得疾伯玠掖以行先生麾之曰吾父在河間存亾
不可知汝當速去兄弟并命於此無益也伯玠持
兄泣先生給使他顧遽自埤堦間躍下伯玠遂死
亂兵先生左足傷為邏所得以見其帥訝其狀非
常人又詢知家世遽延之坐而先生念河間公日

夜泣帥問知狀曰兗州破時河間陷一月矣先生
痛哭投地絕復甦告於帥曰吾父素矢忠節義無
苟全我幸遇公得不死曷縱我去俾收骸骨言已
復絕於地帥憐而許之因間道入曲阜城已遂匍
匐赴河間當是時先生室朱宜人被創甚二稚子
方患痘毅然弗顧也兵火充斥或竟日無所得食
道遇盜賊數十百輩慷慨與語聲淚俱發賊輒感
動引去達河間求父遺骸哭踊盡禮觀者莫不泣
下當河間公自焚時僕呂有年者負幼子伯珣出
走有年道中流矢死伯珣竄民間至是先生攜與

俱歸會稽倪文正公赴召入都過河間為設祭且

走有年道中流矢死伯珣竄民間至是先生攜與
俱歸會稽倪文正公赴名入都過河間爲設祭且
曰父忠子孝吾師也河間公卒未舉禮部實出文
正之門其爲所推重如是先生自鼎革後絕意仕
進暇輒讀書鼓琴間亦爲詩痛弟伯玠之死與伯
珣尤友愛同居三十載無間言教子以忠孝大義
子六人皆有所成就長光猷康熙癸丑進士今爲
翰林院編修次光敏康熙丁未進士今爲吏部稽
勳司主事以 覃恩封先生如光敏官先生歿鄉
人思之私謚孝靖先生
論曰漢東陽顏烏有孝行致羣烏銜鼓之祥因立

縣曰烏傷歷代或稱烏孝或稱義烏皆以孝子得名唐天寶河北之亂常山忠節公死之子泉明負父骨於東京行求宗屬先姑姊妹而後其子子每讀史至此未嘗不流涕嗟慕今觀先生父子間其行事何相類也仲尼弟子達者七十二人顏氏有八人焉韓子稱儒分爲八顏居其二顏氏之於忠孝所由來遠矣子故拾先生事蹟爲傳使史氏有考云

田裕所先生傳

先生諱實粟字裕所姓田氏世爲德州人祖三戒

嘉靖癸丑以甲科起家爲戶部雲南司主事權關

先生諱實粟字裕所姓田氏世為德州人祖三戒
嘉靖癸丑以甲科起家為戶部雲南司主事權關
以廉介聞人稱中泉先生父高諸生讀書不問家
人產家中落故先生少而食貧先生幼至孝遭內
外艱泣血三年未嘗見齒家即貧葬祭一準古禮
與弟實畝友愛常負以行及長終身無間言人以
為難補博士弟子講學鄉塾從游日眾往往強取制
科以去而先生終不遇性素嚴重每旦起正襟危
坐子姓臧獲皆屏息庭以內聞讀書聲不聞婦人
語案置曆書日較行事得失以黑白圈識其上老
而不衰實畝善治生貲稍饒裕然出入問遺悉稟

命先生毋敢擅也先生有子曰纘宗緒宗孫曰書
曰雯曰需曰霽歲時飲酒一堂三世獻酬沃洗雍
雍如也春秋上冢畢集子姓序昭穆坐松柏陰下
述祖德話農桑終身如一日教子孫讀書尤有法
度至今德人稱家法者必以田氏為首卒年六十
有九

論曰漢景帝時人臣尊寵無過石氏號萬石君史
稱其孝謹聞郡國齊魯諸儒質行所不及慶為齊
相齊國慕其家行國大治古今論家法者無如萬
石君田先生雖不遇而其教於家者如此所謂不

言而躬行者與先生歿未久而子緒宗孫雯需以

石君田先生雖不遇而其教於家者如此所謂不言而躬行者與先生歿未久而子緒宗孫雯需以次射策顯名當世豈偶然哉豈偶然哉

范先生傳

先生姓范氏諱可裕字景衛其先系出宋叅知文正公後元末有通一者避兵自吳郡徙如臯數傳至秉倫公某爲理學名儒生樂菴公某樂菴公生瀛洲公某早卒孺人叢以節著撫子自魯公某由孤童至成立以太學生官全茗州州判即先生考也先生天性孝友全茗公奉叢太孺人之官西粵會太孺人卒官舍先生自淮南往逆間關萬里泣

禱於神一夕夢度石梁喬梓成林覺而心動卓午
見有順流揚帆來者風駛舟疾倏忽東逝心益動
急令長年回帆追及之果全茗公舟也父子抱持
相泣人以爲孝感全茗公歸未幾捐賓客先生號
踊幾不勝喪服除應崇禎元年選貢奉母顧孺人
色養遂不欲仕友于諸兄弟怡怡如也兄文學某
以无妄見虐邑令非賄不可解先生妻盧宜人久
病牀箒私儲三百緡備後事先生急取以救兄得
免其內行醇備皆此類先生有子端知儀封縣以
治行遷兗州府河防同知擢戶部郎奉庭訓惟謹
晚年仿文正公義莊之制族姓千指皆計口授食

治行遷兗州府河防同知擢戶部郎奉庭訓惟謹
晚年仿文正公義莊之制族姓千指皆計口授食
凡十七年不倦益賙卹里黨以婚娶緩急告者無
不應亦無德色也年八十又七卒子五人端永育
立雍孫十七人

論曰書言惟孝友于兄弟克施有政吾觀范先生
生平可謂孝友人矣戶部君敷歷內外爲政寬而
有制以幹局稱於時先生躬行孝友以施及其子
者如此是亦先生之政也文正忠宣之流風遠矣

張處士傳

張處士霖者字杏蔭世爲新城東南杜柯村人處

士居張店鎮之東偏有田數十畝闢園一區種松百頭其南築小臺東望花鐵馬公諸山其北有亭有池綠葵紅蓼早韭晚菘取給有餘處士生萬曆中時海內無事不樂仕宦獨喜賦詩飲酒以善釀聞鄉里歲所收杭稻租賦外盡以供釀中更世變益屏跡逃俗襲衣博帶婆娑田野以終其身始予過野寺見處士題壁詩異之康熙甲寅過訪其園居處士聞予至欣然倒屣出坐予池上指松謂予曰是皆老夫手種今五十年矣時處士年已八十七意氣蓬勃引滿勸客如少壯人自言生平不入城

市不謁官府歲正月則畢納一年之賦稅於官故

意氣蓬勃引滿勸客如少壯人自言生平不入城
市不謁官府歲正月則畢納一年之賦稅於官故
胥吏追呼未嘗及門今老矣旦暮且死死則遺令
子孫以布衣斂即日納壙中不棺槨不封樹少讀
漢史慕楊王孫之為人類以末路師法其萬一其
言曠達類有道者明年予遊京師賦二詩寄之乙
丑歲予奉朝命祭告南海事竣過里處士已前
歿治命如其言嗚呼可謂達生也已

論曰予讀班史楊王孫傳未嘗不歎息徘徊追慕
類爲執鞭其答祁侯書所言終化反真蓋深有得
於莊生之旨者處士嚶嚶然乃能追蹤千載之上

遐哉邈矣故著其梗槩為傳葛溝之誦通人諒焉

張先生傳

張心勿先生諱四箴世為新城人居縣北之新橋先生美鬚眉善談笑讀書好持論不苟雷同弱冠補濟南府學生員為文挾奇氣不屑齷齪程試之習以故數絀有司殊自得也居常不問家人生產苗茨數椽北瀕孝水編枳為籬雜植花樹修竹每開戶臨流嘯咏終日或并日而食晏如也生當有明末造知天下且亂獨好兵策奮穎搃擊輒思請纓自效被堅執銳得一當以報國鼎革之初濟南

以東羣盜蠢起率假義兵為名競欲致先生先生

纓自效被堅執銳得一當以報國鼎革之初濟南
以東羣盜蠢起率假義兵爲名競欲致先生先生
心知其非深自避匿曰列郡滔滔誰爲霸府便當
被髮入山詎與小兒曹共槽櫪邪遂棄諸生孺人
稚子力耕雜作無復用世意矣時爲歌詩亦緣手
散去先生性孝友侍親疾居哭皆盡禮兄某爲藩
掾死戊寅濟南之變先生徒步二百里崎嶇畏塗
自負骸骨以歸里人義之康熙甲辰春無疾而逝
會葬者千人皆哭失聲所存濯足軒詩集一卷
論曰張先生非忘世者居常談兵好奇計當草昧
風塵之際鄉里小兒爭竊名號以先生爲智囊非

見幾而作能免弋者之慕乎先生論史右張魏公
予謂魏公逐李忠定而黨汪黃與趙忠簡異而力
引奸檜宋之不競也浚有罪焉至於曲端之死富
平苻離之敗猶其小者耳安得起先生九原而極
論之

文學畢君子萬解元公權家傳

君諱盛育字子萬姓畢氏世為濟南淄川人始祖
敬賢自益都石塘塢徙居長白山南家世力田曾
大父木始讀書積學為通儒與萬曆名臣秋澄王
公齊名翁八子尤著者戶部尚書白陽公自嚴都

御史沖陽公自肅君沖陽公冢孫也父納菴公際

公齊名翁八子尤著者戶部尚書白陽公自嚴都
御史沖陽公自肅君沖陽公冢孫也父納菴公際
竑文章行誼爲鄉里祭酒君少儻質直好義丁
酉試省闈被落慨然棄去帖括闢田園課農桑廣
樹蓄長白之陽厥土赤垣號稱沃壤流泉瀲瀲萬
壑爭注尤宜灌溉君所居黃埠別墅溪流縈抱溪
左右手植榆柳桑柘數千株予嘗過君偶行飯至
溪上夕陽在山萬木交蔭溪水南注不知所窮君
指示謂予溪南有泉曰粟泉泉出平地虜沸如神
瀟然吾引爲陂池藝樹千頭種菡萏餘十畝杭稻
菱芡如江鄉此吾菟裘也予洒然樂之戊午子世

持領山東解額君益力行為善佐其父申明宗法
敦睦族邨從弟盛膚暴疾死君身任含斂再從兄
弟盛岫盛岳相繼歿遺二孤賦稅徭役悉為經紀
延師課讀兩家忘其孤露也其勇於為義率如此
丙寅歲除孫海玥病疫死君哭之慟遂嬰疾旬日
亦卒一子世持

世持字公權幼號聖童九歲屬文抉關雒之奧熟
師避席十一歲就童子試壓其儕偶厥後試輒冠
軍君長身玉立眉目如畫讀書不事章句水邊林
下行吟蕭散意有所會欣然神釋雲情霞思迴絕

町畦康熙戊午以第一人領山東解額其文傳誦

下行吟蕭散意有所會欣然神釋雲情霞思迴絕
町畦康熙戊午以第一人領山東解額其文傳誦
海內不脛而馳自齊魯吳越秦晉閩楚嶺嶠之士
翕然宗之所至聚觀如市四十年來文章之盛傾
動四方如君者未之有也君好交游篤氣誼日與
四方名士縞紵贈答公車入京師公卿競倒屣延
之恐不得一當君君殊不屑也自己未至乙丑三
偕計吏連蹇不第而同學故人多得雋以去布列
館閣君咄咄不樂往淫書空獨語幽憂侘傺不可
告人而君自此病矣丁卯正月君父歿哀毀臥病
稍間至夏六月疾復作下血數升竟卒君器度弘

遠汪汪如千頃陂至於晰義利臨事會如斬亂絲
盤錯無以難也畢氏聚族長白之陽至君十一世
里甲徭役門長率分任之訥菴公於羣從兄弟最
長君曰吾祖老矣此小子責也佐訥菴公綜理曲
折族姓皆服其公有不時至者出私橐代輸再從
叔文學某卒其子貧不能延師君私廩其費數年
無倦色同年某在京師困逆旅不能歸君傾囊資
其僕馬而身自稱貸以還事大父母父母純孝無
間言母病不知人君跪榻下十餘晝夜不歸寢親
戚族屬遇之皆有恩紀砥礪名行以敦倫善俗為
己任鄉先生稱之曰畢君真孝廉矣卒年三十九

間言母病不知人君跣趨下十餘晝夜不息寤寐戚族屬遇之皆有恩紀砥礪名行以敦倫善俗為己任鄉先生稱之曰畢君真孝廉矣卒年三十九子四人海玥前卒海瓊海琬海瑄

論曰史稱萬石君家法孝謹馬伏波誡兄子書曰願汝曹聞人過失如聞父母之名耳可得而聞口不可得而言也吾觀長白畢氏家法類是以君父子之賢匪惟克負荷而已蓋將大其閭門慶延苗裔而孝廉君以文行有名於時館閣方虛左席乃秀而不實未見其止悲夫抑憂能傷人其信然邪

滄海集卷五

二册

帶經堂集卷四十三



帶經堂集卷四十四

歙門人程哲校編

帶經堂集卷四十四

歙門人程哲校編

新城王士禛貽上

漁洋文六傳辯記事

貞烈韓孺人傳

順治初王師定山東探丸嘯聚尚遍六郡劫掠玉帛子女無虛日長吏束手不能禦丙戌丁亥間高苑賊謝遷聚衆數千人連破新城長山諸縣入淄川據之僭偽號置官屬至勞禁旅蕩滌始就誅彝方是時朝廷旰食將帥坐甲累日月而長山太常王公楨妻韓孺人以一女子抗節罵賊死甚烈

賊平鄉大夫洎三老以狀上巡撫中丞將聞於

朝會以代去不果於今二十五年矣康熙壬子歲
太常公以書抵京師謂予傳之予自北角聞孺人
死節事甚悉孺人於法當得謚太常而太常公在

章皇帝時居門下為諫官力可以自達於上顧猶
有待於予今日之言予慨焉作韓孺人傳韓為淄
川著姓自嘉靖以來冠蓋相望孺人父某三歲失
怙母畢育之年十六歸太常甘澹泊躬勤儉荆布
操作事舅姑聽而婉相夫子柔而正中外無間言
太常好讀書為文章聲名藉甚孺人紡紝杼杵以

佐之無倦寒暑丙戌太常成進士官中書舍人將

太常好讀書爲文章聲名藉甚孺人紡紝劈臬以
佐之無倦寒暑丙戌太常成進士官中書舍人將
以孺人入京師孺人愀然曰舅年老矣子姓雖衆
然君家督也今以王事不遑慮遺堂上憂有婦在
朝夕奉慰老人猶君在也遂不行踰歲而賊陷長
山孺人被執怒罵曰吾家世清白無長物有死耳
朝廷何負汝曹而甘作賊旦夕下偏師磔汝矣賊
怒孺人罵益厲遂遇害時順治四年四月二十七日
也又四年太常自中書舍人推擇爲給事中會
覃恩例贈孺人

論曰昔歐陽子論次五代之臣自梁迄周得全節

者三人而已謂於是時責士以死則天下無士獨於號州司戶叅軍王凝妻李事咨嗟歎息三致意焉著之馮道傳首豈非以巾幗大節足愧士大夫之瑤瑤波靡者邪若孺人者其視歐陽子所書抑又難矣庸次其事實以告史官云

李母刁孺人傳

孺人姓刁氏鄒平人歸長山李公世熙有子八人年九十有二以第三子祐之仕為雩都縣知縣覃恩封孺人李氏為濟東鼎族朱丹其轂者項背相望最著者太子太保刑部尚書化熙監察

御史文熙公尚書弟侍御兄也尚書既予告歸養

項背相望最著者太子太保刑部尚書化熙監察御史文熙公尚書弟侍御兄也尚書既予告歸養十餘年而一品太夫人宋壽登百歲有司以聞朝廷嗟異之下詔建坊表旌其門曰貞壽山以東冠蓋咸集羅拜於堂太夫人從堂上答拜尚書兄弟皆皓首蟬貂章服列侍左右衣冠榮之於是尚書年近八十公與孺人亦七十餘矣公八十有五考終又五年而孺人卒視貞壽太夫人之年纔減其八耳春秋二百四十年間錄婦女之賢者三人宋伯姬之貞紀叔姬之義聖人皆謹書之書其卒書其葬不一書焉然彼不幸而丁身世家國

之變君子嘉其賢而又悲其遇其處常而見錄者
惟魯之敬姜一人而已敬姜言必合經博達知禮
教其子為魯賢相宜為聖人之所予孺人之事舅
姑也聽而婉其相夫子也儉而勤其教諸子也恩
不掩義例以春秋之法宜得備書孺人初于歸家
故貧也逮事舅姑箴管滌滲必敬必戒與諸娣姒
以織紵紡績相尚門以內無勃谿及析產受田塵
十畝孺人佐公治生身操井臼絲穀絮帛權其盈
縮與時消息家用以饒諸子就外傳擇嚴師賢友
與遊皆為聞人迨既貴象翟之外不御紈綺其可
書者如此若夫好行其德族鄙緩急不以有無為

與遊皆為聞人迨既貴象翟之外不御紈綺其可
書者如此若夫好行其德族鄙緩急不以有無為
解尤婦人之所難子植之順治辛卯舉人行之辛
卯副榜恩貢生祐之無為州知州佩之邳州衛守
備扶之侯銓知縣芾之武舉敬之容之皆教諭女
二人孫男二十一人曾孫男十三人

王節母徐氏傳

節母姓徐氏長山人也父通薊道僉事日升以萬
曆壬子冠山東解額為時大儒人稱海曙先生母
年十六歸諸生王先生雯舅滄若公罷處州推官
歸病亟母侍湯藥宵衣者爨爨門屏間浹十旬不怠

姑許孺人病母以身代枕時其輾側一七一衣不敢諉左右卒不諱髻而泣血佐外治罌葬必信必誠繼祖姑楊太孺人性嚴毅母婉嫕得其歡心常呼吾孝婦孝婦云年三十三先生不祿母幾以身殉時有子孫枝洎四女矣乃更輟泣撫諸藐孤身兼鞠育孫枝旣成立能文章好交遊所與游皆嚴師賢友孫枝每引衽攘捲而親饋之母乃喜所居當濟青菜諸郡孔道諸名士與孫枝游者結駟連騎騰笈牆進母躬為勻藥漿饌乙夜不少休歷數十年無倦色孫枝嗜讀書不問家人生產又多四

方交家以中落母欣然不以屑意客至更翦髮坐

十年無倦色孫枝嗜讀書不問家人生產又多四方交家以中落母欣然不以屑意客至更翦髮坐薦供酒食遠近稱曰賢母諸女既有家皆以勤儉著聞遵母教也先生有兄妣遺三女母撫之親爲結褵如己出孀姊適鄒平張氏有兩孤養於家延師訓之長萬綏成順治丙戌進士張氏姑貧老具棺槨葬之以禮更爲其子買田築室族鄙待以舉火者常數十家康熙甲子正月二十八日卒年八十有七子一人孫枝昌邑縣訓導女四人適耿弘燧李本泰韓廣居安履孫二人積租曾孫二人河源灤源士禎於母爲族子悉母家世行誼因次爲

傳

論曰傳云婦人學於舅姑者也事舅姑而孝可謂難矣不幸夫死立孤教之讀書取友終成名士不尤難乎魯敬姜教其子文伯以周公桓公下人之道范逵謂陶侃母湛曰非此母不生此子彼二母者古之賢媛也母無慝焉

劉烈婦郝氏傳

明崇禎四年叛將李九成等發難吳橋反戈而南破山東一郡五縣殺人如草十二月七日陷新城劉前徽妻郝氏死之初賊得郝飲之酒郝擲杯於地怒罵曰朝廷何負汝曹而甘作賊吾雖女子恥

劉前徽妻郝氏死之初賊得郝飲之酒郝擲杯於地怒罵曰朝廷何負汝曹而甘作賊吾雖女子恥與狗鼠俱生曷速殺我賊怒矐其目割其乳罵愈厲又斷其舌以血喫賊乃死年三十有二觀者皆掩面泣下事既定巡撫都御史朱大典巡按監軍御史謝三賓監視太監呂直高起潛疏殉節者知縣秦三輔訓導王協中薦紳前保定府同知王象復等十有五人郝與焉建表忠祠於城西之喬莊載在祀典又建特祠所居之側有司旌曰貞烈劉之先有御史溥者仕正德中嘗被旨鞫逆瑾有直聲云王氏新城典史王天民女也年十二同日罵

賊赴火死亦列祠祀賊去而攻濰有卒數十人掠
 少女輿載之追獻其帥抵帥所啓視則已自刺死
 矣乃焚之濰士大夫義其事詢知為新城人惜逸
 其姓氏為立碑瘞骨於孤山

李烈婦胡氏傳

烈婦姓胡氏青州諸城人遂平知縣某之孫年十
 七歸邑諸生李敬中敬中嗜讀書久之抱羸疾崇
 禎壬午歲七月二十七日病革烈婦哭踊哀甚既
 斃遂不哭晨興再拜與姑訣曰新婦不幸失所天
 無子一女又襁抱將從亾者驅螻蟻地下不能復

事舅姑他日叔有子為亾者立後歲時奠麥飯一

無子一女又襁抱將從亾者驅螻蟻地下不能復
事舅姑他日叔有子爲亾者立後歲時奠麥飯一
盂足矣姑力持之曰婦在如吾兒在況婦有女何
死爲其母管亦痛哭諭止百端烈婦一不答徐曰
志決矣義不忍棄死者獨生從容焚香告柩前顧
家人曰吾即死洗含勿近男子遂自經距其夫死
僅三日年二十有四宗鄙聚觀莫不彈指泣下事
上撫按將疏聞於朝會二東有兵事不果又踰年
而賊陷京師明社屋矣後三十九年敬中弟翰林
檢討澄中乃以子沂爲其兄後成烈婦志又述烈
婦事狀命予爲傳

論曰明季壬午癸未間二東婦女死者衆矣或死
俘執或死道路山谷流冗轉徙等死耳令烈婦當
日不即死而死俘執死道路其於輕重之數何如
哉士大夫不幸遇大故苟且濡忍不勝其富貴妻
子之念身名旣敗而猶詫於人曰吾之不死者將
以有爲也夫不歿則竟不死矣若此者皆烈婦之
罪人也

董烈婦孫氏傳

東海高士曰董樵其爲人磊砢負奇節隱居盛山
久之稍稍出遊吳越江淮間賣藥自給予識樵在

十五年之前相遇廣陵別去又八九年已見諸京

久之稍稍出遊吳越江淮間賣藥自給予識樵在
十五年之前相遇廣陵別去又八九年已見諸京
師慨然謂予曰樵不德去年中子道廣歿婦孫同
日以身殉死甚烈徒以貧賤見格於有司不得上
聞於朝以表暴於天下後世吾負烈婦矣言已泣
下予嘗備官禮部闡幽表貞子職也且念樵之意
有足悲者作董烈婦傳

烈婦孫氏棲霞人諸生士彥子歸萊陽董樵子道
廣樵客即墨而道廣病烈婦方歸省父母心動趣
歸道廣病且殆烈婦瞑目絕飲食矢必死三日道
廣歿烈婦從容告廟與姑劉氏訣劉曉大義知事

不可已以頭觸壁血流涕泗被面烈婦弟仲桂長
跪慟哭請緩須臾死弗聽或曰前年叔死娣不歿
何居烈婦曰娣有遺腹義不得歿吾無子義當死
尚何言頷仲桂曰歸語父母勿過哀女無以答劬
勞是所以報耳遂自經歿康熙九年七月六日也
訃聞其母哭之慟士彥曰有女如是於吾足矣何
悲為於是海岱間人莫不奇烈婦之節而多士彥
之賢者

論曰國家重倫常崇教化凡窮谷僻壤義烈之事
令有司條其名狀歲以上聞何其視匹夫匹婦之
行若是重與勿亦以其有關人心世道而然與唐

令有司條其名狀歲以上聞何其視匹夫匹婦之行若是重與勿亦以其有關人心世道而然與唐李習之碑高懸女曰賞一女子而天下勸亦王化之大端也奇節如烈婦而使之湮沒草莽事不上於禮部名不登於太常誰之責與誰之責與

五烈節家傳

孫孺人世父曲江公元配也鄒平人寧國府經歷孫公棧長女于先慈宜人爲同生之姊年十六歸曲江公時先曾大父司徒公會大母路太夫人先大父方伯公先祖母成淑人兩世在堂孺人婉嫕柔順皆得其歡姑成張二淑人繼卒諸弟妹幼穉

皆恃孺人衣食方伯公歎曰吾再失內助諸幼孤
不失所家益治者冢婦力也崇禎丁丑曲江公省
方伯公卒於武林孺人哀甚誓歿自是長齋禮佛
不闢門而語三尺之童不入中門又六年而有壬
午之事先是戊寅本朝大兵入關自畿輔下山
東破濟南遊騎東至長山距新城十八里不攻而
去之至是壬午冬再入關以十一月至濟二十九
日駐兵新城陷之孺人投井死時崇禎十五年十
二月初一日二子士瞻士鵠乘城家人聞變皆散
走惟小婢侍側知狀越三日軍退士瞻兵歿士鵠
以婢言號於井而出之顏色如生年五十八

走惟小婢侍側知狀越三日軍退士瞻兵歿士鵠
以婢言號於井而出之顏色如生年五十八
于孺人青城人世父侍御百斯公元配父永清官
御史孺人性凝重不妄言笑百斯公官翰林御史
在京邸孺人皆從公為廉吏孺人益相勸勉故公
歷巡鹽課茶馬清貧無長物孺人有助焉甲申三
月賊李自成陷京師公號踊期必死家人環泣或
婉轉解譬孺人與子士和獨不語以四月二十六
日與公登樓士和從門閉久之不出家人急闢戶
視之已同縊梁間公左孺人右士和在公下而士
和妻張氏先以壬午十二月城陷自經死孺人歿

時年五十五

張氏新城人生員炳然子戶部主事羽鳳孫也歸從兄廩生士和性質素有荆布之風壬午十二月朔一日城陷自經東閣中以髮覆面初先宜人與張對縊先宜人繩絕不死時夜中喉咯咯有聲但言渴甚士禛方八歲無所得水乃以手掬魚盎冰進之以書冊覆體上又明日兵退得無歿視張則久絕矣

張氏亦羽鳳孫生員炳然子歸從兄舉人士熊士熊字渭濱先世父壽二公長子以壬午舉山東鄉

試甫三月城陷與壽三公母弟生員士雅皆乘城

熊字渭濱先世父壽三公長子以壬午舉山東鄉
試甫三月城陷與壽三公母弟生員士雅皆乘城
歿張氏二十一勵志守貞與士雅妻高一燈紡績
奉孀姑劉二十載順治己亥卒無子

高氏士雅之妻淄川人推官瑋侍郎珩妹也于歸
三歲而士雅殉難高年甫十九有一女撫之成立
居常衣布食粗糲有人情所不堪者或難之曰未
亡人耳得此以為幸元旦一拜家廟先宜人在時
間歲歲朝或一至餘日未嘗履闕三十年未嘗見
齒家世貴盛諸兄皆宦遊澹然如田舍女子殆易
所稱苦節者也康熙戊午疽發背卒

士禛曰先方伯公教家嚴閨門之內儼若朝典又嘗以先高祖母劉太夫人闡範圍說教諸婦女皆凜然知禮義榛栗棗脩秩秩如也壬午甲申之間諸母而下節烈輩出孰謂非方伯公之教漸漬使然哉春秋于宋伯姬之卒既書其葬又載其謚予死義也會有命開館撰修明史謹撫次事實俟史氏節取焉

木瓜詩辯

詩衛風木瓜三章序曰美齊桓公也疏引左傳齊侯使公子無虧帥車三百乘以戍漕歸公乘馬祭

服五稱牛羊豕雞狗皆三百與門材歸夫人魚軒

侯使公子無虧帥車三百乘以戍漕歸公乘馬祭服五稱牛羊豕雞狗皆三百與門材歸夫人魚軒重錦三十兩齊語曰衛人出廬於漕桓公城楚丘以封之與之繫馬三百序謂衛人欲厚報之而作是詩正其事也序之言與左氏內外傳悉合自鄭康成孔仲達而後如歐陽永叔蘇子由呂伯恭嚴華谷鄭夾漈黃東發王觀國諸家皆主序說至朱晦菴獨廢衆說臆斷以爲淫奔之詩噫亦可謂固矣門人輔廣心知其非又不敢斥其師說則穿鑿傳會以求合而不知其愈不可通也輔氏童子問云有學者請於先生曰某於木瓜反復諷詠但見

其有忠厚之意而不見有褻慢之情小序以為美齊桓恐非居後揣摩者所及竊意桓公既歿衛文公伐齊殺長立幼衛人感桓公之惠而責文公之無恩故為是詩以風其上不然則家語所謂吾於木瓜見苞苴之禮行焉豈鑿空而為此言乎先生以為不然曰若以此詩為衛人欲報桓公之德則桓公之惠何止木瓜而衛人實未有一物以報之廣謂以此言之則小序之說亦傳會之失實無所據而先生疑以為男女贈答之詞則亦以衛風多淫亂之詩而疑其或然耳至於家語所載孔子之說乃王肅所纂集固難盡信且與小序之作未知

淫亂之詩而疑其或然耳至於家語所載孔子之
說乃王肅所纂集固難盡信且與小序之作未知
其孰爲先後又烏可據以爲說哉廣之言支離可
笑如此因其師之臆說而欲廢小序因并孔子之
言而欲廢之祇見其愚而自用已矣是詩之作或
在桓公戍漕城楚丘之時或在文公伐齊之後皆
不可知然其爲思報桓德無疑也他如將仲子之
刺莊有女同車之刺忽風雨之思君子子衿之刺
學校廢序說皆確不可易而晦菴槩以爲淫詩輔
氏又曲爲之說以濟之他日晦菴賦白鹿洞云廣
青衿之遺問樂菁莪之長育自與其言相杓鑿毋

亦悔前說之非而欲然於小序之終不可廢乎先
儒或謂大序作於聖人小序作於衛宏或謂大序
作於子夏小序作於毛公唐成伯瑜曰衆篇之小
序子夏惟裁初句其下皆大毛公自以詩中之意
而繫其辭宋王得臣曰關雎后妃之德也此一句
孔子所題其下乃毛公發明之言諸家之說序大
抵如此歐陽子本義多駁毛鄭之失而於小序獨
謂與孟子說詩往往有合後儒異說害詩當以序
為證程子云詩小序皆得大意又云小序當時國
史所作大序則非聖人不能作使小序可廢則漢

隋以來諸儒其說皆出晦菴下乎諸儒之言即不

史所作大序則非聖人不能作使小序可廢則漢
隋以來諸儒其說皆出晦菴下乎諸儒之言即不
可從伊川則晦菴所私淑也將其言亦不可訓乎
晦菴嘗注楚辭矣楚辭言美人言公子言蹇修亦
將以為男女相悅之詞而斥之乎若近世所傳子
貢詩傳以為朋友相贈賦木瓜雖與序異視晦菴
臆說猶為近理然詩傳出近世好事之所為其謂
朋友相贈又因孔叢子之言而傳會之不足信故
當以序為正

金人南遷錄辯

按金史世宗十子顯宗衛紹王而下則永中孰輦

斜魯永功永成永升永蹈永德無允猷之名永升
初封徐王章宗即位徙封隋改曹又改宛衛紹王
即位改封夔宣宗時以永升年高詔宮中聽扶杖
貞祐中薨自世宗迄宣宗時已歷四朝矣蓋諸王
中最老壽者且於顯宗乃第八弟非世宗長子也
世宗本紀大定二年五月壬寅立楚王允迪初名允恭為
皇太子三年命皇太子親王射柳於廣樂園是年
十一月己丑封子永功為鄭王亦非三年始立太
子封諸王也允迪即顯宗世宗嫡子史稱其專心
學問於承華殿觀書乙夜忘倦尤敬禮儒臣鄭松

詹事烏林答愿入謝命取幞頭腰帶見之或曰此

學問於承華殿觀書乙夜忘倦尤敬禮儒臣鄭松
詹事烏林答愿入謝命取幞頭腰帶見之或曰此
見宰相師傅之禮太子曰愿事陛下久以此加敬
爾常作重光座銘及刻左右銘於小玉碑皆深有
理致其賢如此太定二十四年世宗幸上京太子
監國二十五年六月薨侍衛軍士爭入伏哭聲殷
如雷中都百姓皆為位而哭二十六年立子璟為
皇太孫是為章宗顯宗在東宮事蹟始末如此安
得有南涼觀被殺之事耶又顯宗后乃徒單氏章
宗明昌二年崩謚孝懿史稱其好詩書喜老莊學
純澹清懿造次必以禮錄乃稱章宗母趙為降授

南宮千牛將軍楷之幼女抑何其誕謾不根邪世宗賢君也而詆以新臺之行尤為謬妄小說之無稽如此輒令鹿馬混淆白黑雜糅貽誤後世不淺偶讀金史輒因賓退錄辯駁所未及考其顛末著於右方俾後之讀此錄者勿惑焉

章宗以太和六年崩完顏匡等傳遺詔立永濟是為衛紹王錄載牛刀兒弑章宗元映等立磁王允明宦官趙元德等復行弑逆張克己等乃立灘王允文謚磁王為昭宗云云皆似夢囈語金九主遇弑者三熙宗海陵衛紹王是也史皆

特書此錄架空構造半屬子虛亡是殊駭聽聞

金九主遇弒者三熙宗海陵衛紹王是也史皆特書此錄架空構造半屬子虛亡是殊駭聽聞其他紕繆尚多聊舉其大者數條於此

章宗時宋韓侂胄啓邊釁南北連兵吳曦因以蜀叛尋即議和罷兵至衛紹王初元始來伐此錄言愛王請兵北國云云皆妄也

書劍俠二事

新城令崔懋以康熙戊辰往濟南至章丘西之新店遇一婦人可三十餘高髻如宮妝髻上加氈笠錦衣弓鞬結束爲急裝腰劍騎黑衛極神駿婦人神采四射其行甚駛試問何人停騎漫應曰不知

何許人將往何處又漫應曰去處去頃刻東逝疾若飛隼崔云惜赴郡匆匆未暇躡其蹤跡疑劍俠也從姪鵠因述萊陽王生言順治初其縣役某解官銀數千兩赴濟南以木夾函之晚將宿逆旅主人辭焉且言鎮西北里許有尼菴凡有行橐者皆往投宿因導之往方入旅店時門外有男子著紅帽頭狀貌甚獐至尼菴入門有廨三間東向牀榻甚設北為觀音大士殿殿側有小門扃焉叩門久之有老嫗出應告以故嫗云但宿西廨無妨久之持硃封鐫山門而入役相戒勿寢明燈燭手弓刀以待曙至三更大風驟作山門砉然而闢方愕然

持硃封鐫山門而入役相戒勿寢明燈燭手弓刀
以待曙至三更大風驟作山門砉然而闢方愕然
相顧倏聞呼門聲甚厲衆急持械謀拒之解門已
啓視之即紅帽頭人也徒手握束香擲地衆皆仆
比天曉始甦銀已亡矣急往市詢逆旅主人主人
曰此人時游市上無敢誰何者唯投尼菴客輒無
恙今當徃勸耳然尼異人須吾自往求之至則嫗
出問故曰非爲夜失官銀事耶曰然入白頃之尼
出嫗挾蒲團趺坐逆旅主人跪白前事尼笑曰此
奴敢來此作狡獪罪合死吾當爲一決顧嫗入牽
一黑衛出取劍臂之跨衛向南山徑去其行如飛

倏忽不見市人集觀者數百人移時尼徒步手人頭驅衛返驢背負木夾函數千金殊無所苦入門呼役曰來視汝木夾官封如故乎驗之良是擲人頭地上曰視此賊不錯殺却否衆聚觀果紅帽頭人也羅拜謝去比東歸再往訪之菴已空無人矣尼高髻盛妝衣錦綺行纏羅鞵年十八九好女子也市人云尼三四年前挾嫗俱來不知何許人嘗有惡少夜入其室腰斬擲垣外自是無敢犯者某中丞巡撫上江一日遣吏齎金三千赴京師途宿古廟中扃鐃甚固晨起已失金所在而門鑰宛然怪之歸以告中丞中丞怒亟責償官吏告曰償

宿古廟中扃鐫甚固晨起已失金所在而門鑰宛
然怪之歸以告中丞中丞怒亟責償官吏告曰償
固不敢辭但事甚疑怪請予假一月往蹤跡之願
以妻子為質中丞許之比至失金處詢訪久之無
所見將歸矣忽於市中遇瞽叟胸懸一牌云善決
大疑漫聞之叟忽曰君失金多少曰三千叟曰我
稍知蹤跡可覓露車乘我君第隨我冀可得也如
其言初行一日有人烟村落次日入深山行不知
幾百里無復村疇至三日踰亭午抵一大市鎮叟
曰至矣君但入當自得消息不得已第從其言比
入市則肩摩轂擊萬瓦鱗次忽一人來評曰君非

此間人奚至此告以故與俱至市口覓瞽叟已失
所在乃與曲折行數街抵一大宅如王公之居歷
階及堂寂無人戒令少待頃之傳呼令入至後堂
堂中惟設一榻有偉男子科跣坐其上髮長及髀
童子數人執扇拂左右侍拜跪訖男子詢來意具
對男子頤指語童子曰可將來即有少年數輩扛
金至封識宛然曰寧欲得金乎吏叩頭曰幸甚不
敢請也男子曰乍來此且好將息即有人引至一
院扃門而去餽之食極豐腆是夜月明如晝啓後
戶視之見粉壁上纍纍有物審視之皆人耳鼻也
大驚然無隙可逸去傍徨達曉前人忽來傳呼復

戶視之見粉壁上纍纍有物審視之皆人耳鼻也
大驚然無隙可逸去傍徨達曉前人忽來傳呼復
至後堂男子科跣坐如初謂曰金不可得矣然當
予汝一紙書輒據案作書擲之揮出前人復導至
市口惘恍疑夢中急覓路歸見中丞歷述前事叱
其妾出書呈之中丞啓緘忽色變而入移時傳令
吏歸舍釋妻子豁其賠償吏大喜過望久之乃知
書中大略斥中丞貪縱謂勿責吏償金否則某月
日夫人夜三更睡覺髮截三寸寧忘之乎問之夫
人良然始知其劍俠也日照李洗馬應廡聞之望
江龍簡討變云

帶經堂集卷四十四



帶經堂集卷四十五

歙門人程哲校編

帶經堂集卷四十五

歙門人程哲校編

新城王士禎貽上

漁洋文七

墓表

誥授奉政大夫吏部稽勳清吏司郎中萊菴

王公墓表

有明正嘉以後關中衣冠甲族首咸寧王氏王之
先世有隱德至御史江涯公諱懋始大其家江涯
公有丈夫子六最貴者太子太保南京吏部尚書
三渠公諱用賓母弟陽武公諱用賢有子十人其
四爲贈光祿大夫吏部尚書桂園公諱昌功有子

六人貴者四人最著者光祿少卿光庭公紹先吏部尚書弘庭公紹徽光祿仲弟襄庭公紹翰始居三原以鄉舉官止郟縣令贈中書舍人君郟縣少子也母曰趙宜人諱九鼎字金鉉一字棻菴郟縣公與冢子工部郎中之鼎同舉萬曆己酉晚乃得君早露頭角順治辛卯舉於鄉辛丑成進士康熙己酉除東光令東光畿輔邑夙叢逃盜君至申禁令嚴捕緝逋盜屏息民絕株蔓縣鹽額引千歲爲民累君力請減其半又修廟學繕城堞築河堤作人禮士教化大興三輔吏無出其右知東光五年

內擢中書科中書舍人尋以清望推擇入吏部歷

人禮士教化大興三輔吏無出其右知東光五年
內擢中書科中書舍人尋以清望推擇入吏部歷
文選主事稽勳員外郎康熙戊午奉命典河南
省試所拔皆單素時論稱之己未秋有浙撫某中
丞察審之案上特簡君往報命稱旨調考
功員外郎進稽勳郎中辛酉冬朝議九江關移權
湖口不能決命朝官往勘吏部以司屬名上
上曰王某可蓋自浙江報命後上固有意進
用君矣君感激殊遇不遑啓處往返四十日跋涉
六千里冒風雪犯霧露歸次涿鹿而疾作然猶力
疾入見奏事畢始敢退休私邸卧疾甫十日遽捐

賓客君長身玉立風度凝遠有公輔之器又能決
大疑斷大事以是受知 主上駸駸大用而公竟
不能待也詎不惜哉當明正德中江涯公以行人
諫止南巡廷杖幾死嘉靖初以御史疏救議禮諸
臣被謫為高縣典史世稱遺直迨三渠公復以忤
分宜相歸雖登三事論者猶以未竟其用為天下
惜光祿冢宰而後僉謂似續在君顧中道賈志以
歿此予所為臨文三歎而不能已也君學問淵雅
每與予論史事上下千百年皆有據依尤工書法
雅不欲以文士自見故不具論著其服官立朝之

既如此然亦足傳矣生以故明天啓丙寅十月初

雅不欲以文士自見故不具論著其服官立朝之
槩如此然亦足傳矣生以故明天啓丙寅十月初
四日亥時卒以康熙二十一年正月三十日巳時
得年五十有七 覃恩 誥授奉政大夫配李氏
贈孺人繼楊氏王氏贈宜人繼蕭氏男子三人長
夢翼歲貢候選學正次夢庚長安庠生出為冢宰
公後次夢燕女子二人長適涇陽庠生趙之翼次
許字劉祖鏞孫一某長安庠生

誥授朝議大夫廣東按察司僉事提督學政
張公墓表

廣東按察司僉事提督學政海豐張君與予舉禮

部稱同門友又同爲京朝官交最暱康熙壬子予
奉諱里居君出官粵東亂定聞君無恙致事歸歸
甫一載而訃至嗚呼君歷漲海萬里蛟鱷瘴癘崎
嶇不測之險而得不死歸臥田廬而以末疾遽不
起其命也夫君諱爲仁字致堂別字滄粟其先自
昌黎遷海豐曾祖著祖金始大其家號義井張氏
父應科始教子孫服儒衣冠 皇贈朝議大夫廣
東按察司僉事母孫氏繼母朱氏俱贈恭人朝議
公六子君最少少讀書不爐不扇順治丙戌有芝
生於所居之處是年秋再行鄉試君適內艱服闋
遂膺薦君顧愀然曰祿不逮養終身之戚也屢困

生於所居之處是年秋再行鄉試君適內艱服闋
遂膺薦君顧愀然曰祿不逮養終身之戚也屢困
公車益發憤著書隅說闡明考亭之旨濟北學者
師之乙未釋褐己亥除內黃縣知縣甫下車見諸
務窳惰慨然曰天下事無今日不爲而來日徐圖
之理於是相其緩急而次第布之初謁夫子廟見
學宮就圯鼎新之進諸生以時講藝其間以演武
場偏處學宮相度改作自時厥後得雋者彬彬多
文學焉又勸義學聚民間子弟莒秀者教之嘗出
行阡陌間師弟子數十人迎道左辟咄應對皆有
規矩君頷而樂之縣俗尚氣好鬪民間或詬誶輒

自殺諍訟無已君反覆諭以律例俗大變縣有大
姓馬氏同室相傾軋君爲立族長設約束諭以水
木之誼久之遂爲義門其治先教化如此嘗步禱
神祠雨立霑足歉歲損俸輸穀設粥廠十二以食
餓人縣食鹽額四百二十引累年額銷不足鹺使
者議按丁加引君爭之曰內黃昔罹兵燹民多流
宄有數家包一里之丁者有一人包闔戶之丁者
額鹽且壅矧加之厲乎縣有太僕寺牧馬草場三
百餘頃畝徵銀一釐六毫有奇民苦之君分俸代
輸後議畝加練餉一分浮正供且什倍力請如故

縣有衛所軍地奉檄歸縣未有成例軍民更相齟

輸後議畝加練餉一分浮正供且什倍力請如故
縣有衛所軍地奉檄歸縣未有成例軍民更相齟
齟君酌爲成規立符契過割軍民皆德之縣例有
通州料豆協運船胥吏埠頭率骫法賄賣其富者
君爲立法各河口輪次公運或不足則官給其直
吏無所售其奸縣故有驛置自河決後使節稀少
減舊額之半後舊路復通額卒未復君爲力請驛
困以甦縣城袤廣四里餘邏卒無幾君選牌甲壯
丁千人復其徭役更番戍城如踐更然縣外城久
圯而居民鱗次君請於上官以農隙修築不日而
成之立鄉長團練土著遇盜警言互爲聲援又爲尺

籍伍符令游手無所容河北回龍鎮四縣分轄久
爲盜叢君移文鄰縣約期會集比戶登名於版製
令箭四押以四縣符篆而分掌之有事得徑治無
相瞻顧而均其力役自是無竊發者盜王三者劇
拳勇久不能制君計禽之寘諸法境內肅然君在
內黃也慮不能周知民隱擇鄉三老愿謹者月以
望前一日赴廳事條上利弊某宜興某宜革使人
人得盡其意參伍行之故所措施率宜於民略其
大者如上十數事其細微顧不能盡書也居三載
舉卓異第一賜朝衣一襲壬寅擢中書科中書舍

人丁未遷刑部江西司主事歷江南司員外郎郎

舉卓異第一賜朝衣一襲壬寅擢中書科中書舍
人丁未遷刑部江西司主事歷江南司員外郎郎
中以才能推擇修大清律改訂吏部條例有重囚
八十餘人已擬辟詳引律例爭之得改正發遣其
平反多此類焉京朝官十三年凡甄別者三京察
者二皆書上考甲寅擢廣東按察司僉事提督學
政東粵號才藪君與諸生約頒示六條大指以器
識爲主而文藝次之凡故例與學政全書相踈鑿
者一切更張之務寬大不爲苛細平生好獎士類
經其指授率舉制科登館閣知名當時內黃則李
滋黃本訥兩浙則沈三曾許汝龍仇兆鰲粵西則

黃裳吉曹雲鷺粵東則鄭際泰而吳三畏以武進
士廷試及第第一此其尤著者丁巳以病乞休歸
里立族社每月朔具牲醴墓祭合族之長老子弟
生平遇父母諱日修祀事輒流涕極哀諸兄龐眉
皓首事之恭謹俸祿必與共之視兄子如子親睦
族姓無甚富甚貧者學不泛涉務由洛閩微言以
上求聖賢之意其教子姪曰吾生平得力數言而
已生於憂患死於安樂此心纔放禍即伏焉愛人
者人恆愛之敬人者人恆敬之持身涉世之道盡
於此一夕得風疾七日卒君一爲順天武鄉試同

考官一為廣西鄉試主考官再奉

詔使蜀使江

於此一夕得風疾七日卒君一為順天武鄉試同
考官一為廣西鄉試主考官再奉 詔使蜀使江
南一權關杭州四遇 覃恩初授階文林郎再授
奉直大夫進朝議大夫再賜表裏生以故明萬曆
甲寅四月十四日卒以康熙十八年五月初二日
得年六十有六配畢氏封恭人子二人玠理女二
人適楊法李爾夔孫六人賡泰颺泰方泰始泰旭
泰丕泰予惟西漢之盛所以上繼三代者循良多
而吏舉其職也然班史所書蕭曹開國名相惟以
寬厚清靜為天下師而文翁董仲舒兒寬之屬或
云經術潤飾吏事或云仁愛好教化如是而已跡

君之治內黃可以無愧所謂為民去害興利若嗜
慾者非耶為法吏則惡深文為人師則以教育為
先合前後觀之可以為循吏矣於是玠理將以某
年某月某日葬於某阡而予為表其墓

誥贈中大夫山東都轉鹽運使司運使王公

墓表并銘

山東都轉鹽運使司運使千峰王君以書來云先
王父體乾府君之歿餘四十年矣墓道之石闕焉
子有宗人之誼文之者其在子未幾而千峰捐賓
客嗚呼緒言在耳何敢忘乃取公父明初先生所

次行實為表俾鑱諸墓上先生諱養元其先自婺

客嗚呼緒言在耳何敢忘乃取公父明初先生所
次行實爲表俾鑱諸墓上先生諱養元其先自婺
源徙南陵曾祖諱某祖諱某父諱某世以厚德爲
鄉三老先生天性孝友家貧竭力供甘旨兄弟四
人將析爨田宅臧獲自取其最下者兄某得篤疾
一子幼弱藥餌襲斂悉身任之不以累其孤母疾
焚香告天割股以療其行誼過人率如此讀書嗜
左氏史記尤好信陵君魯仲連傳每流連三復慨
然思友其人於千載之上好爲人排難解紛邑中
豪強凌弱暴寡者輒畏先生知之爲諸生五十年
不以尺一干長吏爲文章清古自名一家視程式

之文齷齪不足措意以是老困場屋晚年撫孫奐
曰汝大吾門恨吾不及見也後竟如其言生以明
隆慶庚午九月九日卒以明崇禎壬午正月十一
日得年七十三康熙十七年以孫奐遇 覃恩

誥贈中大夫山東都轉鹽運使司運使元配紀氏
繼配葉氏皆贈安人子二人學大即明初先生

誥封山東都轉鹽運使司運使今八十餘尚無恙
學明孫四人奐即運使君稷國家恩曾玄孫若干
人運使知河間督山東鹺政皆以循良有聞於當
代則先生家訓可知也予生晚不及見先生得遊

於運使父子間竊附聞知之列詩曰貽厥孫謀以

代則先生家訓可知也予生晚不及見先生得遊
於運使父子間竊附聞知之列詩曰貽厥孫謀以
燕翼子惟先生有焉是宜銘

不在其身在其子孫樂石嶙峋表此墓門以昌厥
後人

張學海先生墓表

先生諱繼倫字學海晚號雪松老人其先淮安人
自處士友始遷安丘數傳至澄以明經主武安簿
澄生守蒙守蒙生民感字霖海以子贈文林郎文
林公生三子先生其第二子也兄嗣倫萬曆壬子
舉人弟緒倫崇禎辛未進士官御史先生生三月

而文林公歿稍長母王太孺人爲擇名師授以尚書太孺人督諸子嚴每塾歸必命夜讀而自紡績其側先生與兄弟感母意競力於學先生少有異稟年十四補邑諸生天啓丁卯貢入太學崇禎庚午應山東鄉試主司賞激其文以多奇字置副榜是時以明經謁選人例得縣令不就初先生與其兄弟同有盛名於場屋至是兄弟先後得雋去顧先生獨不遇先生自痛不逮養其父事母至孝太孺人以老壽終先生日夜孺子泣久而不衰少與兄弟同學相友愛事孝廉君如父比病革藥餌必

親事丘嫂二十年不懈侍御君巡視兩淮齟政有

兄弟同學相友愛事孝廉君如父比病革藥餌必
親事丘嫂二十年不懈侍御君巡視兩淮齷政有
巨商某罪當抵攜重貲走千里乞先生一言緩其
獄先生艴然曰吾方以辦職勉吾弟顧翫其法耶
絕弗與通其兄弟間行義相成類如是尤為德於
鄉黨明末兵興二東郡邑多陷薄安丘先生佐縣
令纂嚴城守指畫方略城賴以完時流亡相屬凡
入縣境者率收卹之亂定各遣歸其家有鄉人負
幼女倉皇過門問之則將粥以償官錢也出金籬
其負女得不粥有遠賈糴粟邑中將行發視半沙
礫知為駟僧所紿然莫能誰何之先生為白有司

治如法賈竟獲原直歲祲有貧士數十人求發官廩不得先生慨然指困賑之甲申客青州時山東大亂賊魁趙應元自長山夜襲青州入之先生間道跳歸有識之者曰勿驚長者卒免於難先生長九尺美鬚須貌臞然以清嗜讀書淹通經傳諸史旁至醫卜皆窮其奧書學蘇米晚得二王之神予又嘗從斷縑見所畫風竹蕭疎圓勁節目磊砢想見其人非天機清妙不能造也嘗闢書室空無所有惟圖三代鐘鼎盃鬲之屬於四壁蓄一琴時撫弄以寄意夷然不屑也順治己酉復遊大學未幾

歸歸得痰疾四日卒先生有侗儻之才高潔之操

弄以寄意夷然不屑也順治己酉復遊大學未幾
歸歸得痰疾四日卒先生有佃僮之才高潔之操
既不用於世退而修行於家為德於鄉里故其可
見者止於此而已生萬曆乙酉六月某日卒順治
乙酉十月某日年六十一娶許氏河間縣知縣進
之子前卒繼娶孔氏男子一人即貞康熙壬子拔
貢官翰林孔目女子六人婚嫁皆名族以丙戌歲
五月某日葬城東五里河之原於是距其葬三十
有二年矣

吳臨穎墓表

康熙丙午歲予居京師一日於榮水部開邸舍見

壁上詩署名曰吳震者一再讀之愛玩不忍割去
評水部誰何水部太息曰同年故吳君康侯之子
震幼孤肆力於學問所為歌詩數十百篇率可誦
震有母年五十有弟三人妹二人婚嫁皆仰震震
年二十一再赴太原試於有司不見收家益落輒
挾其文章北游京師謁父執之官中朝者久之無
所遇震有妹嫁安東縣旬月前襍被策蹇驢往江
淮去矣逾二年戊申三月蒼頭通賓客視其刺則
震也躍起相見稍稍與談藝多微中詢其家門衰
落之狀泣而言曰震父以乙未第以丙申死顛沛

半生而不獲一日之安鄉國稱善士而不食一日

落之狀泣而言曰雯父以乙未第以丙申死顛沛
半生而不獲一日之安鄉國稱善士而不食一日
之報年不及艾官不及生前乃於身後授官臨穎
天乎悲哉言未既涕泗縱橫下予爲反袂久之自
是與雯數飲酒賦詩歡相得也歲且暮一日雯請
間曰雯將歸省母願雯父之歿也雯方十有三歲
未能出遊當世賢豪長者乞其言以傳後世每一
念之若負芒刺先生固天下之名能文辭者所以
不朽雯父將在先生之言予哀其志乃爲據狀而
表其墓君諱允升更名來亨字于公一字康侯世
爲遼陽人少從其祖官雲南祖歿王事君獨與父

孝廉李君墓表

傳曰先王之制爲三年之喪也使夫過者俯而就之不及者跂而及之也子夏除喪而見予之琴彈之而不成聲子張除喪而見予之琴彈之而不成聲尼父皆無譏焉古道浸衰江河日下與其爲師也者毋寧其爲商也長山孝廉李君之沒四十年矣冢子孟縣君一日來謁予文表墓其容深墨矐矐然皇皇然若在初喪者可謂賢矣予方宅先祭酒府君憂感君意不忍終據禮以辭乃爲之表按狀孝廉君姓李氏諱篤之字元根其先棗強人曾祖

芳洲翁諱某祖見山翁諱某父太學公重熙自見

客萬里外會遼左多故父隻身北歸視其家而留
君於滇客中無書探篋中得漢書一部遂日夕讀
之且讀且泣鄰有盧先生者聞而異之請與相見
問讀何書曰漢書也叩以疑議應答如響盧先生
者駭曰此非常兒引歸其家歲餘父再至滇乃與
俱歸補定遼右衛諸生順治二年中鄉試七年就
選人得蒲州學正會叛帥姜瓖據大同三晉震動
蒲境時有竊教事平奸人或藉以羅織善類君力
請於制府孟忠毅公全活甚衆平居與諸人切劘
為文章助以道義成就甚夥攝知滎河縣事以清

惠聞順治十二年成進士人方謂君長駕遠馭之

為文章勛以道義成就甚夥攝知滎河縣事以清
惠聞順治十二年成進士人方謂君長駕遠馭之
才可以一試明年正月而君病且歿矣嗚呼可哀
也唐元道州有言曰正直而無祿位忠信而久貧
賤仁讓而至巽亾異於是者顯榮當世誰為辨士
吾欲問之若吳君者可謂正直忠信仁讓之士也
而坎壈摧折不得展布尺寸卒賣志以死豈非天
哉君娶朱氏有子四人雯霽霏霞女二人適陳發
劉麟書孫一人江蘭雯出雯年少負才氣為詩歌
文章踔厲風發非終貧賤者君未竟之志雯必繼
之君可瞑也已

孝廉君姓李氏諱篤之字元根其先棗強人曾祖
芳洲翁諱某祖見山翁諱某父太學公重熙自見
山翁已上三世皆以宮保公化熙九列 皇贈光
祿大夫太子太保都察院右都御史君少有異稟
日誦數百言號奇童爲諸生篝燈課讀如後門單
素崇禎丙子歸安凌忠清義渠武進陳伊菴組綬
典山東鄉試二公海內聞人得君文奇之以第三
人中式明年丁丑春官下第已而庚辰癸未再報
罷旣數困公車又遭世亂遂發憤嬰疾以死君少
倣儻好振窮周急身為貴介而修布衣之行居恒
請謝賓客如恐不稱有鄭莊之風客至輒流連閉

閣徵歌頌曲參橫月落飲酒至數斛不亂邑姚徐
兩姓囂訟十餘年得君片言輒解牛某侵官帑株
蔓親族甚衆君慨然白之釋無辜數十人俠聲流
聞慕義者遠近如一東武王某為怨家所中其父
兄謂曰必長山李先生也能活汝者扶服五百里
及門君力出之無德色其勇於為義比日此類乙酉
春感痰疾不起無知不知皆搯擊太息配趙孺人
德言純備飯衣白業撫孤子二人比日成立布衣蔬
食二十六年如一日焉君生以明萬曆丁未十二
月初三日卒以順治乙酉二月初六日年三十有

九孺人生以萬曆戊申八月初五日卒以康熙辛

月初三日卒以順治乙酉二月初六日年三十有九孺人生以萬曆戊申八月初五日卒以康熙辛亥八月十八日年六十有四子三斯升早卒斯恒貢士起家于孟縣知縣斯孚廩生女一適予從姪啓溥太史公謂古者富貴而名磨滅不可勝記唯儻非常之人稱焉跡君生平折節善下緩急倉卒可恃拔人於危而不自為功所謂非常之人與顧連蹇弗遇年不及強仕惜哉予故表其梗概俾鑱諸麗牲之碑聊慰于孟縣君之愾慕云爾禮曰父母既沒必求仁人之粟而祀之孟縣君將以予言為仁人之粟也予滋愧矣

帶經堂集卷四十六

歙門人程哲校編

新城王士禛貽上

漁洋文八 墓誌銘

誥封中大夫通政使司右通政加一級開雍

伊公墓誌銘

邑有篤行君子伊公諱光啓字開雍一字純仁其
先自棗強徙新城祖澤父覺民 皇贈通政使司
右通政加一級母宋氏贈淑人生二子公其次也
兄光前公天性淳朴內行尤謹事繼母董如所生
三十年無幾微不豫之色事兄如父兄老無子以

長子闢為之後即中丞君士大夫所稱翕菴先生者也中丞既長不知己為伯父後蓋公夙昔未嘗一語及之慮傷兄意也兄既歿中丞年未及冠夷衾牆翬皆倚辦於公中丞與弟望江令巘同時有聲場屋公益課督不少假中丞以順治戊子領解額乙未舉禮部入翰林授御史望江亦以丁酉戊戌繼登甲科公始欣然曰乃今而後可慰吾父吾兄於地下矣中丞按山西游歷九卿開府望江一理寧國再知廣宗望江兩縣皆以清白著聞家無餘財公之教也中丞官門下省遇 覃恩贈祖父

皆中大夫通政使司右通政公亦以令甲得貤封

餘財公之教也中丞官門下省遇 覃恩贈祖父

皆中大夫通政使司右通政公亦以令甲得馳封
如其官益自謙挹儉約居常布衣蔬食出則徒步
無高車大馬兩君自宦邸製綺紈以進歲時一御
輒笥而藏之時植杖田間與田父話桑麻量晴雨
以此自適避竈爭席人我兩忘不知其身之翔貴
也橫逆之來犯而不校有婁貞公呂許公之量故
遠近稱為長者中丞奉 命撫滇卒於軍 朝廷
恩卹甚厚時公年八十餘矣不哭神傷遂患目眚
猶強飯無恙戊辰得末疾不起壽九十嗚呼洪範
五福公可謂兼備之矣乃其終身蔬布居貴而善

下足以敦薄俗興仁讓為鄉里模楷尤人之所難
能老成隄矣誰為典刑予能無臨文而悲歿瘁哉
生以萬曆己亥年九月十二日申時卒以康熙戊
辰年九月二十六日申時 誥封中大夫通政使
司右通政加一級元配耿氏 誥贈淑人子二人

闕順治戊子解元乙未進士巡撫雲南兼建昌畢
節等處地方贊理軍務兼督川貴兵餉都察院右
副都御史出為伯父後嚙順治丁酉舉人戊戌進
士寧國府推官裁補廣宗縣知縣再補望江縣知
縣女五人適王者棟王士慤呂斌張奎象郝彭年

孫五人作楫作梅作霖矩作德曾孫十一人應聘

縣女五人適王者棟王士慤呂斌張奎象郝彭年

孫五人作楫作梅作霖矩作德曾孫十一人應聘
應徵應召薇應簡應舉應麒應掄應卜應知應選
元孫三人清濤清溥清溶望江君以某年某月某
日葬公於邢莊先塋之次先期來請銘銘曰

泰山桂樹德之懋兮帶索行歌樂則壽兮不驕不
侈昌厥後予丸丸松柏鬱且茂兮京兆之阡百世
无咎兮

誥授資政大夫巡撫雲南兼建昌畢節等處
地方贊理軍務兼督川貴兵餉都察院右
副都御史翁菴伊公墓誌銘

世祖章皇帝御極之十有二年予與翁菴伊公舉禮部爲同年生閱二十六年康熙庚申予在翰林而公以大理卿拜都御史出撫雲南明年六月訃聞京師予與其弟望江令巘相向哭又踰年公子作霖走千里匍匐乞誌其墓一夕大雪被酒回憶三十年間與公遊好聚散死生之際有足感者因反袂濡筆而為誌按狀公姓伊氏諱闢字盧源別字翁菴系出唐僕射慎之後元末始自棗強徙新城數傳至澤始為公會祖生效吾公覺民是為公祖 誥贈中大夫通政使司右通政加一級有子

二人長太恒公光前

誥贈中大夫通政使司右

祖 誥贈中大夫通政使司右通政加一級有子

二人長太恒公光前 誥贈中大夫通政使司右

通政加一級是為公父次開雍公光啓 誥贈中

大夫通政使司右通政加一級是為公生父公生

而岐嶷與母弟巘同學齊名順治甲申乙酉間邑

人士倡為曉社公兄弟為職志人稱二伊戊子領

山東解額第一文傳四方乙未成進士 世祖章

皇帝留意人才初破館選分省故例 駕幸南苑

引見諸進士改庶吉士三十二人至公名 上顧

左右曰此山東解元有文名公之受知自此始既

入翰林每 御試唱名及公輒語左右如前丙申

四月特授科道若干人公授廣西道監察御史在翰林甫歲餘蓋異數也丁酉奉命巡按山西六月遇覃恩加一級公自念受上不次恩清白自矢冀報稱於萬分一適前政以毛鷲為能公矯之以寬大而人皆肅然尤矜慎庶獄疏請減釋者前後至七百餘人凡有薦達必衷於公議如彭中丞有義卞司馬三元後皆開府為時名臣差竣遂掌京畿道事己亥九月與李御史森先同日内擢京卿公自授御史出按山西歸掌京畿道事以至内擢皆不次計資僅三載其受知之深如此尋宅

母賈太淑人憂以生母耿淑人卒請假治喪皆盡

內擢皆不次計資僅三載其受知之深如此尋宅
母賈太淑人憂以生母耿淑人卒請假治器皆盡
誠敬勿悔康熙庚戌閏二月補光祿寺少卿轉通
使司右叅議是年十月擢右通政戊午九月轉左
己未八月進太僕寺卿十月進太常寺卿屢遇

躬祀郊廟諸大禮執事有恪

上目屬之是年十

二月遂拜大理寺卿班於九列會王師入滇填撫
需才上環顧廷臣惟公謹慎可任遂以庚申三
月拜公都察院右副都御史巡撫雲南兼轄建昌
畢節等處地方贊理軍務公感激兩朝恩遇又
以遐方新附陞辭兼程而南時方溽暑歷五谿

毒淫之地上霧下潦不遑啓處及抵昆明諸道大帥畢集主客兵以萬計所需靡屨糧糗芻艾之屬稱是咄嗟取辦公手口拮据頭鬚畢白未幾而疾作然猶殫心區畫密疏請禁擄掠以收民心辛酉五月初八日病革遺疏以奉職無狀不能報國恩不及見滅賊為憾又疏薦雲南布政使王繼文自代蓋是歲十月而雲南平去公之卒僅五月耳上聞震悼賜祭葬如例以繼文代公巡撫公素廉謹及歿於軍中遺橐祇十餘金行李蕭然雲南提督桑格公與貝勒將軍督撫諸公共欣助之始聞

關萬里歸於故園悲哉公性恬退與物無競淹卿

督桑格公與貝勒將軍督撫諸公共攸助之始聞
關萬里歸於故園悲哉公性恬退與物無競淹卿
寺十餘載處之夷然泊拜撫滇之命雖慷慨赴軍
義不返顧然微察其顏色慘澹與故人言若永訣
者予心訝之蓋是時公生父通政公年八十矣絕
裾而行陟岵而悲公之懷抱有不敢以告人者卒
之以身殉國未竟厥施詎不痛哉公在臺二載屢
有章疏率多削稿所存按晉奏議若干卷嘗輯錄
本朝四十年來名臣奏議若干卷未成書皆藏
於家喜撫晉人帖合處入能品生以天啓癸亥五
月十七日卒以康熙二十年辛酉五月初八日年

五十有九配何氏累封淑人子三人作楫作霖作
德女六人王啓澤李嗣貞王啓大王啓演李瓊鮑
秉謙其壻也孫六人應聘應徵應召應麒應掄應
舉曾孫二人清濤清溥以二十二年十一月十七日
葬於新城西北五里邢莊之 賜阡系之銘曰

井鬼之墟王良策騎希蹤爨翫效尤吳淠鐵橋開
道金精呈瑞 帝咨上卿持節往帥維此遺黎庶
其有斃舟無弭櫂駟不頓轡馬革疆場誓平僭僞
賈志未伸歿而猶視哀哉勞臣以死勤事北極
恩綸東園祕器華表嶙峋石闕顛顛後有觀者視

吾銘誌

恩綸東園祕器華表嶙峋石闕顛履顛後有觀者視

吾銘誌

敕授文林郎掌山西道事山西道監察御史

彤臣傅公墓誌銘

經言卿大夫之孝曰口無擇言身無擇行如是而已矣此蓋言其常不言其變若天倫之間所遇不偶終其身幽憂怫鬱而卒以孝聞卿大夫或不幸而出於此也若吾友侍御傅公之孝能使朝堂知之鄉國稱之海內之人共信之嗚呼豈偶然哉公諱辰字蘭生一字彤臣別號麗農世為新城潘孟店人明初徙居高樓店曾祖現祖納謨世有隱德

父世準以公貴 敕贈文林郎山西道監察御史
母焦氏 敕贈孺人事具太傅金文通公謨誌初
焦孺人夢旭日入懷而誕公生而岸異讀書目十
行下終身不忘家苦貧卒業華嚴寺僧寮寒暑不
輟受知學使者項公清溪錢公允器之屢試壓其
儕偶崇禎壬午省試中副車文名藉甚時邑人士
方舉從社公年尚少已為職志繼舉曉社因社皆
執桃茆為盟主歲甲申 世祖章皇帝定鼎 詔
下郡國選拔真才入成均學使者澹菴房公首以
公充賦時江北初定判銓者頗懸異格以待公不

屑就益肆力為文章十三經二十一史旁洎諸子稗

公充賦時江北初定判銓者頗懸異格以待公不
屑就益肆力爲文章十三經二十一史旁泊諸子裨
官之書舟次部居無不博綜辛卯中省試乙未舉
於禮部丙申筮仕河間府推官明允爲畿輔第一
浹歲之間五登薦剡丁酉奉 特旨行取 世祖
章皇帝御試者再戊戌授山西道監察御史己亥
巡視南城丰采凜然是歲掌山西道事凡熱審
朝審哀矜折獄多所全活庚子奉 命按江西道
出河間遮道攀轅者數千人公題詩驛壁云直道
餘風今尚在士民接踵問平安其感人之深至此
舟抵彭澤饒九道陳君韓遴入白事請間曰九江

兵且變奈何公詰曰餉足乎曰壓餉七閱月矣公
笑曰有司之罪也能辦兩月餉乎曰可公曰事濟
矣疾馳湖口詰朝逆風而渡鎮率列營東郊將弁
屬橐鞬迎道左公具威儀而入盛服坐堂皇將弁
入謁畢大聲諭之曰西江無事日久將懦兵驕其
由來者漸矣然兵仰於食兵不用命率由枵腹庾
癸之呼豈得已哉吾奉 天子命按茲土入境即
知此地缺餉七月有司玩愒行當按之今先給餉
兩月汝等將卒皆宜畏法紀遵約束脫有偃蹇三
尺具在吾不汝宥立召九江守給餉如額士卒皆

震動感泣事遂解散其從容定變如此方次第按

尺具在吾不汝宥立名九江守給餉如額士卒皆
震動感泣事遂解散其從容定變如此方次第按
部網舉目張而撤差之 旨下矣公聞命襆被就
道辛丑念繼母周太孺人春秋高遂陳情歸養太
孺人性卞急自公諸生時不輕假顏色公柔色下
氣或長跪終日俟太孺人意解乃敢退既貴居子
舍益恭謹人以為難甲辰葬贈侍御公盡哀盡禮
四方觀者莫不歎息公流涕曰葬之厚何補養之
薄哉公既痛贈公與焦孺人不逮養所以奉周太
孺人者無不至問衣燠寒朝夕奉敦牟進甘旨疾
痛苛癢不去左右雖年五六十猶孺子也庚申太

孺人病亟公行年七十猶朝夕侍太孺人病尋愈而公病作矣又四年遂捐賓客嗚呼悲哉公平生多神異諸生時有巫覡為社鬼所憑公至即避去曰傅公正人也辛亥冬公得寒疾危甚夢觀音大士以甘露灑其頂曰君至孝格天當延壽一紀已而脫然又十二年而公歿異哉公長身修顙目光如電聲欬作洪鐘響每羣賢高會掀顙談笑上下千百年如指掌四座盡傾昔人經神腹笥不能過也為人忠信樸直胸無籬棘嘗訓諸子曰吾顙汝輩為道義中君子不願為功名中小人也雅負經

濟一試於瀛海再試於西江未竟厥志而塵以孝

輩為道義中君子不願為功名中小人也雅負經
濟一試於瀛海再試於西江未竟厥志而塵以孝
聞悲夫公自乙未通籍辛丑歸養立朝僅四載林
居二十餘年日以砥名行厚風俗為事後進一言
之善提獎成就如恐不及予少於公二十歲髫時
私為清明憎蚊二賦公見之激賞有過情之譽辛
卯乙未皆附公後為同籍三十年來道德相勗文
章相益過失相規交誼庶幾近古今已矣昔子產
聞子皮卒哭之曰吾已無為為善矣嗚呼豈不痛
哉公所著奏疏二卷古賦一卷詩文集二十卷詞
曲二卷詩話二卷讀書涉筆二卷硯田漫筆四卷

續筆二卷姓譜增補十卷韻府補遺六卷增訂堯
山堂外紀一卷新城軼事一卷傅氏博考一卷藏
於家生於萬曆三十二年五月一十四日卒於康
熙二十三年九月二十六日得年七十有一以順
治十四年三月 覃恩敕授文林郎元配胡氏贈
孺人繼配田氏封孺人子二用霖汝霖女三人適
劉沂于允昱伊矩孫四人景范景蘇景韓景歐用
霖等以康熙二十五年三月十八日葬公於城西
北賈莊之新阡來請銘銘曰
尼父有言行在孝經孰其嗣之曾閔是承嶽嶽傳

公名世代興埋輪都亭雅志澄清中歲詠懷歸臥

尼父有言行在孝經孰其嗣之曾閔是承嶽嶽傳
公名世代興埋輪都亭雅志澄清中歲詠懷歸臥
巖扃白華朱萼比潔敷榮七十而慕孝通神明人
之云亾邦絕老成粲粲樂石刻此新銘敢告惇史
吾言足徵

誥授光祿大夫光祿寺卿介岑龔公墓誌銘
康熙二十四年春戶部尚書侍郎等上言邇者錢
穀徵輸條目多而版籍繁兼有尾數冗雜官吏易
作姦請屏除舊弊更造簡明全書示天下奏聞
天子曰可咨於九列舉練達 國計之臣董其事
於是僉謀以光祿寺卿龔公充監修官公先取江

南州縣徵科最繁者刪薙梳剔歸於至簡次及山東尾數悉除慮昧者反以為不便乃援唐元和四年元稹同州均田狀作收零積餘議書未成公疾作卒於京師公初仕為龍驤衛經歷出知安定縣事逾年以治行聞擢戶部河南清吏司主事是年以南郊禮成加一級歷戶部江西清吏司員外郎遷兵部武科清吏司郎中尋出為山東按察使司僉事分巡直隸通永道居五年擢江南布政使司布政使累加級一品舉天下卓異第一入覲還旋被

內召未至除大常寺卿改光祿寺卿公

之知縣事也至則舊令罷黜以逋賦未去者二十

還旋被內召未至除大常寺卿改光祿寺卿公
之知縣事也至則舊令罷黜以逋賦未去者二十
一人道縣事不可爲涕泣語公公笑曰天下寧有
不可爲之地乎及按籍則逋賦五年矣縣徵銀例
有羨公曰革此是要譽也置櫝於堂存以抵舊賦
繇是積逋悉完舊令得免罪歸民之流移者咸復
乃繕學宮葺民居立市集修驛務清囹圄焚刑具
於庭上官胥吏無敢下縣徵索者其入爲戶部也
管通州西倉倉君有蠹號黑白檔子遇八旗給俸先
與交通故爲爭擊往司倉者不能禁輒避去委出
入於胥吏公至立唱籌法日坐倉門驗出入倉蠹

不敢作姦差坐糧廳首禁牙戶毋治帳具取償運
丁凡運米在石埧曰經紀在土埧曰車戶奸民為
之魁渠指供億官長為名率稱貸於龍斷者迨給
腳價錢則魁渠與龍斷者析而有之公至革魁渠
揭運米榜經紀車戶姓名於衢以次呼之預給腳
價錢運者得無困又漕糧抵埧既輸倉例有簞羨
銀給運丁先是俟米入廩完日始給則運艘已回
弁受其利公驗漕舟起運即呼運丁以簞羨銀給
之漕舟歡釳焚香於岸者千人勒碑交頌公德其
官兵部也掌三司印務京察稱職居一等其分巡

通水道也兼司空運廳稅課公周知其弊駟僧交

官兵部也掌三司印務京察稱職居一等其分巡
通永道也兼司空運廳稅課公周知其弊駟僉交
憚公楊起龍潛京師謀為變事發伏誅於時告訐
者蠡起民有賽社者製儀仗迎神為怨家所訐公
取驗悉焚之轅門外富家子為盜牽連拘之則其
貌不類公察其偽令僕三五偕富家子並立俾盜
識之盜誤指僕為富家子冤乃白平寇將軍出師
自潞河南下塗方積雪公念輓夫寒飢分遣僕隸
載饌饌五車給之飲以薑湯輓夫懽騰於路察哈
爾叛公勘羽書恒至夜分置郵供餽無缺晨起念
三河縣令甫之官未識其人遂懷白金二鎰以匹

馬自隨馳入縣城縣令方詰窘乏策公輿以金為
區置乃還蒙古兵經通州公慮為民擾列軍校道
旁持白挺俾按隊入城擊出隊者市不改肆九門
水口圯僉估須七萬金公往勘謂三千金可集事
修冷口邊牆估減類是伶人黃丁者投旗下橫行
鄉曲貸錢運戶強留其子女為僕妾人畏避之會
軍興有例輸烏槍者官議敘公首以百竿進加二
級吏胥入賀公曰若等知我意乎我非藉此為榮
也令甲責旗人者當降級我今可以撻黃丁矣吏
胥多與丁往還潛誡之匿不敢出三等待衛達爾

馬詐傳

勅旨公解其佩刀執送吏部其在江南

胥多與丁徃還潛誡之匿不敢出三等待衛達爾
馬詐傳 勅旨公解其佩刀執送吏部其在江南
甫至督造戰艦湯斯祚者販木商也要結權勢長
揖見督撫臧否官吏以治烏船為媒恣伐民間墓
木一日謁公語及私公起據案坐呼皂隸持撻將
撻之斯祚叩頭乞哀乃遣去未幾以慙憤死江南
北旱潦公請帶殓折征 命未下先檄州縣停征
且為粥食餓者會有 詔蠲田糧督撫議富家不
蠲公謂富民無一定里胥報未必實若質庫鹽筴
皆有定稅欲於力田之民求富者實之則騷然不
寧矣先是土有雜稅有司倍蓰征於民公按其科

則廣為勒石江南素尚侈公以習俗之奢婦人爲甚禁士民妻妾不得用金珠犀玉飾釵珥器禮有縛采為亭翦紙象人鳥獸之屬及拔河走馬掉險竿為戲者悉禁之守藩六年發滇黔楚粵閩饗六百餘萬未嘗後期營米必按汴地近遠分給勸課農桑力行常平義社倉墾田至三十六萬餘畝增人丁至二萬六千餘及率計吏入朝疏言腹地蘆洲與濱江有別不宜槩丈同時計吏凡五十疏天子獨俞公所奏焉其為太常卿也 陞見 命行禮於 中和殿既受事修會典更樂章 遣祀

與祭齋香帛步中規矩其為光祿卿也寺雖設漢

行禮於 中和殿既受事修會典更樂章 遣祀

與祭齋香帛步中規矩其為光祿卿也寺雖設漢
官案牘皆清書公飭筆帖式凡公文悉譯漢字禮
部移取外藩供應率不用印公不可須用印乃發
寺歲造官酒取度支米二萬餘石復需帑金萬餘
采麴釀公詣酒局止酒鎗一具計窮歲不過燒酒
十萬斤其餘皆沽之市遂上言於 朝凡 郊廟
讌享用官酒餘用市沽歲省米二萬石帑累千金
公性孝友執親喪盡禮與弟同居五十年未嘗析
箸李自成陷京師公靡所依倚主塾師王氏家既
而王歿惟留一少妾公與其飲食寢無帷薄之隔

經年不亂見婦女俘獲者輒出私錢贖之築武林
義莊於廣渠門內建育嬰堂於三山門外置義田
收租入以哺孩提之棄於道者其為善若不及嚴
於取與錢穀出入一以平常有大帥愠公乘公發
饗疑權衡未足密遣人索營弁所領銀則銖兩不
爽提調武闈有遊擊入幄將有所干訶之出縣令
請見公望其行步蹣跚若負重者斥曰汝懷中非
金耶吾豈受賂者亦不劾汝以沽名也薦屬吏必
以公不徇私好故多得人性喜聚書江寧學宮明
德堂北舊有藏書板殘闕公選諸生磨勘補成完

書數百卷又雕

欽頒四書講義以行其為政持

德堂北舊有藏書板殘闕公選諸生磨勘補成完
書數百卷又雕 欽頒四書講義以行其為政持
論利未可遽興當先祛其弊故所至有異績焉公
諱佳育初名佳胤避 皇太子睿名改今名字祖
錫晚又字介岑杭州仁和人曾祖景鵬祖應嶽考
勤庶皆不仕以公貴俱累贈至光祿大夫曾祖妣
祖妣妣皆一品夫人配李氏封宜人贈一品夫人
有賢行先公卒子一翔麟好學有文中康熙二十
年順天鄉試副榜侯補主事女一嫁舉人餘姚邵
瓚孫一肫生於明天啓二年九月丁巳卒於康熙
二十四年七月丙戌卒之日橐無餘資次年翔麟

乃扶柩歸以某月日葬於青龍山之原予嘗與公同為戶部郎公入為卿寺予官祭酒與公父子情益親於公之葬翔麟請銘不忍辭銘曰

公浙產廬江千年十五乃之燕宅爾宅城東偏遭坎軻卒自立掾東堂奮等級牽絲行執戟入視天庾領儲胥公所至聲有餘除武庫贊中樞左輔雄倚觀察峙糗糧賦藁靺息爭訟執趨黠牧江表政更優剛不競柔不絀宜報最宣殊猶金綺賜倍曩昨衣織袞章以鶴飲茶膏 體仁閣歷太常光祿卿人高車公以萃人孔揚公不盈征輸法算未渺

民也愚胥則狡蹙數贏但中飽大農言 帝曰俞

卿人高車公以萃人孔揚公不盈征輸法算未渺
民也愚胥則狡蹙數贏但中飽大農言 帝曰俞
孰善是編成書僉言公衆不如公之廉僚吏準公
之心夙夜謹公之才試未盡登膺仕歲則多郭無
田廩無禾有哲嗣能克家青龍岡神所舍漸江水
走其下魂歸來娛大夜諏吉日宜子孫伐貞石鏤
吾文百千禩銘斯存

誥授朝議大夫四川按察司僉事六如南公

暨配田恭人合葬墓誌銘

康熙二十六年某月日渭南南毓涓以其世父鼎
甫狀走二千里來告曰涓世父嘗備官於朝公清

直諒為世聞人不幸遠宦邊徼遭時大亂瀕於死者數矣冒潦溼犯霜露出九死一生幸而得歸歸而病且死死無三尺之孤昔曾王父廣川君行述於先王父司空王父年錄世父述之今世父平生行實湮沒弗彰責在小子四世兩門以姪狀叔悲哉世父歸自蜀年六十餘老矣涓一日從容請立後世父嗚咽流涕曰吾家四世伶仃在子惟吾在孫惟汝苟汝克舉孫使主吾後不斬先人祭祀足矣安望其他言未竟涕泗交頤下涓泣家人皆哭失聲涓遂不敢再請世父未病數言生平心相知

惟今國子祭酒王先生將來以墓道之銘累之世

失聲涓遂不敢再請世父未病數言生平心相知
惟今國子祭酒王先生將來以墓道之銘累之世
父歿涓以治命走京師而先生宅憂歸濟上非先
生言世父目且不瞑予奉書泣下其忍不銘按狀
南氏之先自晉入秦世居渭南田市里正嘉間瑞
泉先生大吉姜泉先生逢吉兄弟皆進士起家講
明橫渠之學姜泉生陽谷先生軒嘉靖癸丑進士
由翰林歷官副使著書滿家陽谷先生有四子次
憲仲萬曆甲戌進士官止棗強知縣是為廣川公
次師仲萬曆乙未進士歷官禮部尚書是為宗伯
云宗伯生居恒官生早卒即君父也廣川生居益

萬曆辛丑進士歷官工部尚書世稱二太先生君少孤撫於司空司空無子以君弟廷鈇爲嗣則涓之父也君幼而方嚴雖兒戲造次必整容七歲居宗伯憂如巨人喪祭以禮八歲通經史日誦唐人詩八家古文爲文章有根柢年十五補縣庠生有聲崇禎己卯中副榜讀書北雍亡何丁甲申之變司空殉節廷鈇亦死君哭踊絕復甦風雨漂搖譙羽脩尾幾無室家順治丙戌中陝西鄉試受知益都孫文定公累上公車不第謁選人得柳州府推官時龍城尚阻聲教隨大軍駐桂林奉臺檄閱兵

亡賴子詭冒尺籍坐糜軍食甚衆君令魚貫以進

官時龍城尚阻聲教隨大軍駐桂林奉臺檄閱兵
亡賴子詭冒尺籍坐糜軍食甚衆君令魚貫以進
間一詰籍貫年齒入伍月日率倉皇無以應遂盡
得實而汰之一軍驚服無敢譁者又奉檄攝昭平
卻例金千餘弗受以六條厲學宮以五事諭百姓
巡按御史田君歎曰南君三日昭平勝他人數載
再攝平樂墾荒均徭如昭平之政大兵入龍城攝
知府事首布 朝廷威德明示 詔書以綏柔遠
人之意粵兵驕橫民多去市井匿深箐中君慷慨
與將帥約盡破文武藩籬同心戮力為 國家奠
南荒計於是流人漸集徭獍輸誠者二十餘都諸

生崎嶇自歸者九十餘人柳僻在徼外訟或不兩
造而以賄免君懲其弊不遣一役下屬邑至即庭
鞠立罷遣之囹圄一空報最爲諸郡第一稍遷同
知河間府怡然曰吾入粵親故送酒水上皆相視
流涕罷酒訣去以爲此生不復相見在柳再病皆
製繇今幸生還北渡洞庭初望不及此吾敢負丞
哉其在河間也直道事上間有齟齬侃侃以去留
爭之不少貶入爲戶部浙江司員外郎遷禮部主
客司郎中皆以廉幹聞會蜀撫請增設四道擢分
巡松威道按察司僉事龍安古陰平地松潘居岷

山之陰高山大谷番回雜處君推心置人腹中益

巡松威道按察司僉事龍安吉陰平地松潘居岷山之陰高山大谷番回雜處君推心置人腹中益申明約束郡縣守令緩賦稅省刑罰與民休息民戴之如私親尋署按察司事赴成都甫兩閱月而滇南告變偽檄至大吏集議君斷斷持之曰死耳敢污偽命以上辱朝廷下辱家門哉賊知不可強遂聽解官賃居城南趾不達城市者七年先是君左足不良於行至是增劇吉都督孫略者君姻家為謀橐餽車馬始歸秦歸日嘯咏芝山酒水之間自號六如老人癸亥冬十一月十九日方命酒無病而逝得年六十有六君內行修潔事必師古

年十四迎田恭人於頻陽六禮皆如古不惑流俗
葬司空及弟鈇於新市皆如禮孤兒幼女撫之如
己出婚嫁以時幼受經郭先生伯固郭既歿教其
子修羽為諸生振羽授室生子其力行古道皆此
類也渭南南氏關中之望人門不可梯接君生於
富貴澹泊清儉其天性疏直不立城府當官剛勁
不可撓折與人交初若孤峻難合久之更樂其坦
易予在禮部與君同省署君固落落獨引予為同
志以蜀臬入 覲京師未至前數日夢君執手殷
勤道契闊已而君至笑謂元白梁州之事無異也

君善書多著述所著壽樂園集金臺玉壘岷江諸

勤道契闊已而君至笑謂元白梁州之事無異也

君善書多著述所著壽樂園集金臺玉壘岷江諸
集如千卷藏諸家元配田氏天啓壬戌進士御宿
公女勤儉嚴慎克相夫子累封恭人生萬曆乙卯
九月十七日卒康熙十九年庚申十一月二十一日
得年亦六十有六以再從姪毓溥子士棻為後毓
涓志也銘曰

終南之陰河渭之陽石麟辟邪鬱鬱相望宗伯司
空奕葉用光唯公祔之陟降在旁南山峩峨渭流
湯湯公之流風山高水長

誥授大中大夫河南布政使司分守驛傳鹽

法道參政涪村杜公墓誌銘

明天啓中有直臣曰江西左布政使杜公詩以不
建逆奄魏忠賢祠罷聲聞天下事具國史方伯公
生贈參政公若昧有子七人君行在第三諱澆字
子濂別字湄村世濟南濱州人生而英特方七歲
塾師授李翰蒙求讀竟悉諳其典故十一歲補博
士弟子員丁父艱服闋中順治乙酉鄉試丁亥復
行會試 賜同進士出身筮仕真定府推官君年
甚少恆山又畿南望郡數決大獄爰書如夙習老
吏亡敢詆謫者張忠勤公存仁以兵部尚書總督

直隸山東河南調集諸道兵平榆林賊覆其巢穴

吏亡敢詆謫者張忠勤公存仁以兵部尚書總督
直隸山東河南調集諸道兵平榆林賊覆其巢穴
凡所俘獲皆付君執訊君言於制府謂大亂之時
脅從者衆渠魁旣戮餘者當使歸農以布 國家
威德一切殲之徒獲曠土何益獄成多所縱釋尚
書初疑之旣而寤謝曰君年少敢肩鉅如是吾不
及也所全活數千人居三歲以治行高等考授禮
科給事中先是河決荊隆口東北趨海水勢溢溢
入東兗濟南諸郡灌縣邑官亭民田亾算君抗疏
論劾河道方某請專遣大臣行河且言疏上游以
去其壅導支流以殺其勢然後乘水涸併力塞之

疏入得 旨特命工部尚書劉昌工科都給事中
許作梅往監視數月底績又疏言瀕河田土被水
患最酷宜停徵以甦民力皆報可在掖垣十閱月
疏數十上會有 旨以廷臣出親民事君與焉補
分守溫處道參議處在萬山之中俗辟陋而溺女
淹容錮婢三事尤為民病君朔望集士民反復開
諭為改器葬婚嫁之禮一從儉約女婢滿二十歲
責其擇配俗為之變遷副使備兵通薊通密邇京
師豪室巨猾膠牢固結號為難治君不茹不吐風
流令行僕區法嚴民易罹罪為立保甲之令什伍

相保奸無所售司密薊兩鎮餉絕朘削之弊秋杪

流令行僕區法嚴民易罹罪為立保甲之令什伍
相保奸無所售司密薊兩鎮餉絕股削之弊秋杪
例一點兵飲食秣莖無所驛騷有冒名尺籍者爬
剔無隱將弁畏愛之至於催漕濬河不憚劬勩王
文通公永吉督倉場恨得君晚會天津道屬小園
漕艘失事諉罪通薊遂奪二級註誤去官事尋白
復以副使備兵淮海兩淮鹽筴甲天下官其地者
率緣以為利鹽艘自場捆載之真州例由備兵使
者驗放君曰鹽有專司吾何與焉吾自有海防與
民事耳言於巡鹽御史力辭之自是驗放專歸轉
運人服其廉又出私錢造救生船高寶湖中以拯

覆溺全活歲數百揚屬十縣各置義冢五畝貧民
始獲葬地羣歌舞之會有裁并之 旨改補巡視
寧紹海道至是凡再渡浙江矣時初改文武相見
禮徃徃相抗不下君至即交歡大帥兵民帖帖亡
詬誶者遷分守江鎮道左參政兼攝龍江西新二
關既又遙攝揚州關務持大體捐苛細值淮揚方
築埧濬河課稅不登而裁并之 旨又下矣家食
十二載居母憂盡禮三年喪畢補分守開歸道參
政兼理驛傳鹽法時滇黔用兵乘傳旁午驛騎告
斃者接踵君檄各驛於額外得倍畜之官給芻秣

又請開府咨部令諸州縣得市馬塞上馬既蕃息

斃者接踵君檄各驛於額外得倍畜之官給芻秣
又請開府咨部令諸州縣得市馬塞上馬既蕃息
則又時其水草節其勞逸又創追鋒車以羸駕之
省馬力之半中州食鹽舊分隸長蘆河東山左兩
淮四運司厲政多端而緝私販為甚越本邑一步
則捕之煎土一斤則捕之巡役攜鹽密置人家則
又假乞水火誣捕之君察知姦私以律反坐鹽政
肅然先是君鞅掌王事勞瘁致疾會羽檄交馳不
敢以休沐請康熙辛酉冬雲南平巡撫中丞以君
病入告遂致仕歸歸四年卒君性孝友與兄弟析
產田取其近先壟而瘠者宅取其故者先祠在焉

曰吾以便奉祭祀也叅政階得廕子舍子而任其弟杲嘗以母夫人命置筵室詢知其士人女也贈匱而嫁之夙負知人鑒戊子順天同考首得周體觀爲海內名士爲推官援孫承恩於理爲給事中免吳國對禮部磨勘更推獎之順治戊戌二君皆進士及第執弟子禮終其身家世工書君書尤適媚得大令之神詩有奇氣類山陰徐渭南城陳允衡撰國雅取君詩壓卷人以為定論君風流儒雅吐屬無一俗語顧當官屹屹不可搖撼在淮海時某中丞者細人也惡君強項數較轢之終不為屈

生天啓壬戌六月十九日卒康熙二十四年乙丑

某中丞者細人也惡君強項數較轢之終不為屈
生天啓壬戌六月十九日卒康熙二十四年乙丑
十一月初八日得年六十有四階大中大夫歷官
河南布政使司參政贈祖父皆如其官祖母程贈
淑人母張累封太淑人配孫氏累贈淑人繼齊氏
累封淑人男子二人亮曾知縣章曾太學生出為
人後女子六人崔林琮李顥王士麗王澄閻有縻
李容麟其壻也以康熙二十六年十二月十六日
葬於城西北祖阡杲亮曾來請銘銘曰
城南之杜去天尺五下杜樊川多名宰輔遷於琅
槐始別為祖巖巖方伯涕唾閹豎文孫繼之繩其

祖武居門下省袞職是補一斥不復觚稜夢阻歷
 試江海甌越吳楚梁宋之郊人歌杜母大難既平
 公亦解組海山兜率爰復其所渤海之濱如堂如
 斧觀彼九原吾將誰與

帶經堂集卷四十六

帶經堂集卷四十七

歙門人程哲校編

帶經堂集卷四十七

歙門人程哲校編

新城王士禎貽上

漁洋文九

墓誌銘

誥授奉政大夫廣西分巡左江道按察司僉

事李公墓誌銘

公諱允禎字貞甫別字修菴其先贛人後遷濟南
之德州曾王父汝棟隆慶庚午舉人王父煥太學
生考嗣美贈奉政大夫工部員外郎李氏之世至
方伯公逢時始大方伯為御史有聲明世宗朝嘉
靖庚戌屢上書言兵事其後出按宣大力言馬市

非是忤大將軍仇鸞事具前史自方伯至公凡四世公少而端重不妄言笑稍長嗜讀書湛於古學工部侍郎程公紹見其文異之崇禎癸酉舉鄉試數困公車順治元年除知故城縣改知豐縣遷兵馬司指揮歷工部營繕主事虞衡員外郎屯田郎中擢廣西左江道僉事以病致其政歸歸五年卒其為故城路當子午會國初征勦四出舟車驛騷公按符而給民不知病縣戶丁額二萬餘鼎革後死亡過半而額詎如故公編審得見丁七千有奇餘悉除去始至豐吏盛陳金幣於署公曰此餌我

也卻之縣民噐訟者羅織富人輒破家公請於監

餘悉除去始至豐吏盛陳金幣於署公曰此餌我也卻之縣民噐訟者羅織富人輒破家公請於監司臺受牒必下之縣鞫得誣罔狀杖斃其魁劉某等於通衢訟以衰止豐民某妻美而豔其僚壻富豪也挑之不從又詬厲之豪怒賂盜引某誣服矣公閱案牘所坐止一布疑之夜微行入獄有二人閭中偶語收案之即豪也詰得其奸立釋某而寘豪於法甲弟死利寡婦之產賂乙自誣與婦姦公下乙獄遣甲與婦歸其家久不為理而令獄吏私於乙曰甲與弟妻已均產釋惡矣及即評先呼甲案前語叱之退繼呼乙至佯怒曰據甲供狀乃強

姦強姦罪當死趣下重囚獄乙謂甲賣色懼吐實
遂正二人罪有兄弟訟田直在弟而吏數直其兄
公反其獄而責以大義二人慙悔痛哭遂為兄弟
如初其治獄明決皆此類河決徐州臺符下徵柳
萬束例派里社公曰吏樂從事民將弗堪但下教
借牛車數兩吏不測所為以請公曰豐西部十里
許有柳蕃衍數百畝無主者刈取之足辦此矣事
集而民不知太學生吳某連土寇陷碭山監司才
公俾攝其事屬以辦賊公出不意掩捕獲之餘黨
解散株連者悉置勿問越數日濟上軍至聲言且

屠城公具牛酒扉屨犒師數十里外其帥欲入城

解散株連者悉置勿問越數日濟上軍至聲言且屠城公具牛酒扉屨犒師數十里外其帥欲入城覘賊公曰罪人已得餘皆赤子何勞大軍為力持不可縣境以安其在工部督造端門工成進秩賜文綺廢馬督清江廠船政潔廉自矢材美而工良窮丁無力供造有繫累瀕死者盡釋之暇則復清江書院以造士歲饑設三廠以食餓人全活萬計公自縣令歷郎署陟監司所至以幹局見稱而廉聲流聞孚於神明格及盜賊其事往愴甚異嘗夜自碭山渡河遇賊艘知為公也相戒勿犯赴粵舟次小孤山風起水湧長年無人色公仰天祝曰

某平生自信俯仰無愧否者神當覆吾舟語畢而風止待命岳州愛岳陽樓風物之美遂居之午夜恍惚若有神告曰速去甫移居而樓火公少事王父父母以孝聞既舉孝廉盡推產與其弟歸里後杜門謝賓客訓課子姓門以內皆有禮法數語以祖宗忠厚勤儉之道或以橫逆來輒巽語謝之不較也鄉鄙皆以公為長者生以明萬曆庚子十一月十一日酉時卒以康熙元年九月二十六日巳時得年六十有三娶宋氏贈宜人繼趙氏董氏封宜人子三人浹順治丙戌進士芮城縣知縣宋

出濤康熙乙卯解元丙辰進士翰林院編修潤廩

封宜人子三人浹順治丙戌進士芮城縣知縣宋
出濤康熙乙卯解元丙辰進士翰林院編修潤廩
生董出女子一人適教諭趙珪董出以康熙四年
二月十五日葬河東祖塋系以銘銘曰
試當盤錯古循吏仕不大昌功則沛令名無窮年
不逮有子式穀及苗裔我銘其藏視萬世

勅授文林郎河南道監察御史趙公暨配房

呂二孺人合葬墓誌銘

康熙丁卯冬前河南道監察御史趙君卒於里第
逾歲其孤澤普以狀來泣請誌隧道之石君任順
治之初予尚童穉及予通籍於朝則君歸田間

久矣故予與君平生弗習也然竊聞鄉人言君為政於家四十載事繼母至孝友于兩弟范暉所稱成名立方而可書獨行者君實有焉最君門內一節已足信惇史傳後世況其表表者不但已也君諱班璽字受介別字餘菴益都顏神鎮人也其始自北崖泉徙高祖考龍泉公敬簡嘉靖丙午舉人鞏昌府通判曾祖考肅齋公爾待萬曆癸酉舉人金華府推官皆有名蹟祖考服休考世熠諸生性倣儻教子甚嚴君倣儻過其父而事親孝謹嘗大雪侍簷下雪沒脛不敢退早補青州府學生員為

文章敏妙絕人或列置數題數人環給筆札徐行

雪侍簷下雪沒脛不敢退早補青州府學生員為

文章敏妙絕人或列置數題數人環給筆札徐行
口授一時並就文采爛然人輒無能效者順治乙
酉舉鄉試第四名明年釋褐成進士時世祖章
皇帝定天下初行制舉詔禮部貢士自庶吉士

外拔其尤二十人授科道官君在選中補河南道
監察御史出按四川時秦寇賀珍武大定等出沒
秦鳳沔漢間褒斜道梗君募壯士數十身帕首握
刀跨馬日馳百餘里度隴坂之險間道崎嶇達漢
中至葭萌賊翻天鷄者據巖投石不得過君諭以
朝廷威德降之時成都尚未內附以保寧為行

省治所君抵閬巡撫都御史李勤襄公國英暨總
兵官馬化豹嚴自明惠應詔等諸大帥皆在易君
儒者以軍事嘗君君為指畫隴蜀要害且言大兵
埽除寇孽之後不事戰而事守填撫之術不以兵
而以將某以書生受 天子命在行間誠無所事
事願諸君功罪可入告也遂閱軍實饗士卒單騎
按行諸壁壘丰采凜然衆乃懼服按部順慶萬縣
賊數千北走遣精騎迎擊破之通川南路已而惠
帥營卒毆民幾死君捕而笞之一軍盡甲君上疏
劾奏曰全蜀當獻賊蹂躪之餘戶口殆盡臣按部

所至唯見黃蒿塞路白骨盈城耳蜀地先叛後服

劾奏曰全蜀當獻賊蹂躪之餘戶口殆盡臣按部
所至唯見黃蒿塞路白骨盈城耳蜀地先叛後服
自昔而然今天威震疊新入版圖惟恃封疆文
武大吏招徠有方申明約束使兵民相安西南可
幸無事總兵官惠某桀驁自恣縱兵殃民跋扈飛
揚漸不可長非痛加誅譴臣恐禍亂之萌方自此
始是時姜瓖反河東連延關內疏久之乃得達得
俞旨旣復命尋按山西未幾召還辛卯七月
丁父憂歸遂罷君歸而奉母怡聲柔色御食佐餽
扶持抑搔如孺子太孺人安之忘其非已出也篤
愛兩弟易衣共硯不減古人置田授宅過其子鄉

里化之顏鎮富山水暇即登臨置酒召親故飲弈
絲肉間作尤喜獎藉後進以藝文就質者丹鉛甲
乙與壺觴錯互經其指授率得雋去丁卯十一月
示微疾卒年七十配房氏繼配呂氏俱前卒箴管
饘飽以先介婦前後齊軌子七人澤普澤鼎澤旭
澤愚澤同澤壯澤漸女子六人李唐瑚仇祖孫子
仲韓聰臨高之馭其適也一未字孫七人允彬允
莊允正允智允禮允沖允祺以康熙二十七年十
月十七日合葬虎埠崖之祖阡系之銘曰
譬于越出匣而未竟其用我特書之視君陳與張

仲

譬言干越出匣而未竟其用我特書之視君陳與張

仲

誥封昭勇將軍童太公墓誌銘

予居京師於交游士大夫間稔聞雲麾將軍童君
求我之賢童君之子又受經吾友中書舍人李君
之門故予知童君家世尤悉舍人嘗為予言童君
父瑞芝先生今之古人也已聞先生卒童君方病
亟又以毀卒於是士大夫聞者莫不咨嗟太息適
舍人以先生諸子狀來請誌隧道之石不可辭則
撫其實而書之按狀先生諱庚年瑞芝字也其先
蘭谿巨族九世祖以明永樂間徙北平隸籍錦衣

衛為京師人數傳至贈武略將軍完初公是為先生父有子七人先生長也少讀書有名諸生間已念父老慨然從業稍習計然之術事武略色養慎終宗族稱孝諸弟多早世與鑾儀裕成君相友愛白首無間言教童君兄弟如嚴師口授孝經小學應對進退皆有禮法童君既服官環衛益勉以忠孝大義順治丙申年五十有七即以家務付諸子語之曰吾夙昔有向禽之志今其時矣結茅西山之麓當水石佳處與二三禪衲徃復叩擊結忘言之契春秋勝日蠟屐扶筇探尋夔絕見者以為雷

次宗劉遺民之流也晚構草廬數椽在鹿鳴澤中

之契春秋勝日蠟屐扶筇探尋夔絕見者以為雷
次宗劉遺民之流也晚構草廬數椽在鹿鳴澤中
日焚香默坐而已去京師百里歲亦不一二至也
己未春童君兄弟迎養歸里第夏四月以疾終於
正寢春秋八十將易箒顧諸子曰生死晝夜耳勿
過悲婦女各歸室勿亂人意惟一二老友以善吾
生者善吾死願畢矣遂遽然而逝先生為人忠信
樸直與人交久而能敬嘗面折人過退無後言取
與一介不苟有德必酬其或負己者坦然忘之不
較也武略在時或以金相付託其人死且久訪其
子孫倍予之蓋嚴於義利之辨如此以長子蒙古

官雲麾使初封武略將軍進封昭勇將軍生前明
萬曆庚子十月十八日卒康熙十八年己未四月
十一日配楊氏故錦衣衛百戶其澄女子三人長
蒙古鑾儀衛掌左所雲麾使後先生卒次蒙利太
學生次蒙貞兵馬司指揮女子四人長適郟陽縣
丞陳貞次適太學生亢文光次適丁宣茂次適候
補主事張猷孫八人金粟金莖金章金鑑金華金
璧金奎金鑣曾孫二人潮潤以康熙十九年三月
初一日葬左安門外三里墳莊寺前系之銘曰
先生之志寧靜澹泊先生之身貞觀丘壑八十年

中不愧不忤神遊太初翔乎寥廓我觀九原逝者

先生之志寧靜澹泊先生之身貞觀丘壑八十年
中不愧不怍神遊太初翔乎寥廓我觀九原逝者
可作

侯選知縣馬君墓誌銘

康熙二十年十一月二十五日渠丘馬君三如卒
瀕易箒顧屬子石麒曰吾即死必阮亭子誌吾墓
旣而石麒持狀匍匐千里將父治命予交君兄弟
三十年矣雖言之不文不忍辭按狀君諱長春三
如字也世為青之安丘人九世祖四公卜居城東
五里河一日樵於壠次有虎伏林莽眈眈然四公
祝之虎遽弭首去人稱虎林馬氏七傳至中丞公

文煒明嘉靖壬戌進士歷官都察院右副都御史
巡撫江西以功名著聞是為君曾祖中丞有子三
人長應龍與弟給事中從龍俱成萬曆壬辰進士
歷官禮部精膳郎中平生著書數百卷號稱博雅
是為君祖禮部生廣文孟道是為君父君少穎異
又家多賜書與從父弟澄承其家學以古作者自
期從給事公受三禮又從萊陽宋澄嵐先生遊與
諸宋給事琮侍郎致相後先名日起後入大澤山
讀書遇掖人王漢上下其議論交相重也一日歸
給事問所與友對曰有王子房者讀書不事章句

知霸王大略將相才也未幾王登第不數年至都

給事問所與友對曰有王子房者讀書不事章句
知霸王大略將相才也未幾王登第不數年至都
御史死兵間世謂君知人崇禎甲申之亂挈家南
渡客金陵時中原板蕩四方名士猶集留都皆與
結納久之北歸鄉里順治丙戌秋再舉鄉試遂薦
於有司數困公車不以屑意治圃數畝有古木數
百章修竹千挺又植昌州海棠紅梨各一株於草
堂之側布袍草履日婆娑其間樂而忘老性嗜茶
茶具必精好嘗蓄名茶客至論文輒自前點飲客
以爲樂蕭然欲友陸鴻漸段礪之之流於千載之
上友人韓君為長興令邀過之君笑曰吾當為嶰

茶往耳行滕負筥入洞山顧渚間身雜茶人采焙
傾橐中裝悉以製茶其漫興如此法書名畫繇鼎
之屬過眼輒辨時代徃徃典衣易之遇亂崎嶇避
地必以自隨邑人李氏有古鼎君嘗借觀倉皇南
渡及河得之囊中曰吾歸未有期寧以一物失信
故人耶遣使數百里負而還之君清真簡遠望之
如晉宋間人然言動必遵古禮少養於王母辛安
人辛安人曰此子生而知禮當使學禮因授三禮
之學於給事公云嘗定祭儀一卷躬行於家人取
衷焉甲申奉兩尊人避賊瑯琊山中晝負母而逃

夜則負米山外徃徃至終日不食親亡後有時食

衷焉甲申奉兩尊人避賊瑯琊山中晝負母而逃

夜則負米山外往徃至終日不食親亡後有時食必墓祭然後敢嘗見平生琴瑟几杖脂澤奩具之屬輒嗚咽流涕江南王良年流寓北海死先生為營塋瘞墳墓養其母終身宗族親戚倚以婚嫁者尤衆族弟某粥田先生既數歲矣一旦呼語之曰吾受此田懼汝幼不能守也今毋慮矣以還汝劉丙妻某氏夫死誓不嫁其伯強之不從號於塗先生遇而問之改容曰貞婦也乃欲奪其節乎禮而而養之為畢男女婚嫁趙某者家貧將粥妻妻抱泣先生聞而止之曰已受直奈何先生立以十緡

償之妻不得粥歲大祲縣欲報富戶以賑貧先生
請於令曰富戶報貧者未必濟乃富者亦貧矣令
悟事遂已平生厚德不勝書書其梗槩如此君與
澄皆以詩名澄前卒其詩多散佚康熙庚申君寄
予五言詩一章予酷愛其語似孟東野亦賦五言
寄之未踰歲而訃至嗚呼悲哉君既困公車康熙
庚戌隨例試吏部得縣令需次而卒生於故明萬
曆三十四年七月二十五日距其卒得年七十有六
娶高氏繼娶高氏子一石麒女子一適韓知靜孫
一維駒先生彌留時所命名也所著竹香齋集若

千卷藏諸家系之銘曰

一維駒先生彌留時所命名也所著竹香齋集若
千卷藏諸家系之銘曰
遠紛華適真素七十年蛻風露汶河之濱有封樹
後之過者式君墓

待封徵仕郎文學陸先生墓誌銘

先生姓陸氏諱敷樹字映萼別字賁菴唐宰相宣
公三十三世孫也世居嘉善縣東北奉賢鄉稱奉
賢支宋迪功郎伯玉公諱瑀者有子四人皆致通
顯始大其家王父繼林鄉飲賓父維祺太學生世
有隱德母郁孺人生母黃孺人先生幼篤學黃孺
人感心疾十餘載屢籲天請代孺人卒攀車輅欲

以身殉父太學君曲譬之乃泣涕受命久之學使
者按郡或引禮經庶子在父之室則為其母不禫
之文勸就有司試泣謝不應鄉黨稱孝焉君母郁
孺人病嘗鍼藥皆不瘳公日夕舌舐之目復明人
以為孝感事父母極色養居喪日進一溢米三年
未嘗見齒撫兩庶母弟遠樹恆樹無間言先生天
姿穎異為文以具區石簣為法西江黎公博菴督
學兩浙待以國士名日起一日游雲栖遇異僧謂
君骨相有厚福第不獲身貴耳自是無干祿意課
子榮登榮科讀書每至漏下四十刻引燭令歸寢

乃寢康熙庚戌榮登成進士歸誠之曰古人顯親

子榮登榮科讀書每至漏下四十刻引燭令歸寢

乃寢康熙庚戌榮登成進士歸誠之曰古人顯親
非科第之謂其謂資父事君造福民物庶於祖德
詩書兩無負耳吾三十年前見一村農受貴家豪
奴捶擊吾廉其族望密以告得釋免否者斃老拳
矣士大夫置身高倨外言不得入惟左右狎近是
聽不至流毒鄉黨不止小子識之性儉朴斷葷脫
粟怡然樂之終身不置妾媵徒步出入里門值故
交野老與談夙昔道桑麻晴雨長吏下車一通姓
氏不復請謁尤敦故舊業師某歿久未葬手為營
窀穸封樹凋卹貧乏無倦色津梁道路圯者陂者

身任修葺常大書為善最樂四字置座右焉己未
弟遠樹歿以哀致疾遂不起所著四子精義世滋
堂文集輯古今人四六各若干卷嘗讀王介甫集
至先大夫述舉示榮登曰子不可諛父是文足以
法矣榮登志緒言故述先生行質而可信生明萬
曆三十九年十二月十二日亥時卒康熙十九年二
月二十五日申時享年七十元配盛氏子二人榮
登康熙庚戌科進士廣東英德縣知縣榮科庠生
女一適楊雋標孫四人起蒼起蔚起苞起芳榮登
以辛酉年十二月十八日卜葬奉賢鄉麗字圩東
南阡祖塋之次遵治命也銘曰

以辛酉年十二月十八日卜葬奉賢鄉麗字圩東

南阡祖塋之次遵治命也銘曰

貞元宰相之子孫流風奕葉傳清門繩其祖武昌
後昆身雖歿矣道則尊我銘其幽無愧言後有知
者觀九原

賜進士出身高君暨韓孺人合葬墓誌銘

陶弘景自言永明中求祿得輒差舛不爾豈得為
今日之事姚平仲出奇計夜斫營壘一不中騎青
羸夜馳七百里入蜀青城山人謂仙去不死予嘗
論之使貞白得祿仕為校書郎不免與沈范齊列
平仲功成名立不過中興名將爵徹侯耳孰與仰

青雲睹白日之樂耶淄川高君釋褐成進士脫屣
一官輒棄家入勞山居上清宮晏坐終日餌芝朮
侶猿猱渴飲溪澗之流久之有所得歸臥一樓人
罕梯接其卒也預知時日殆亦貞白平仲之流與
君諱瑀字介如別字逸叟其先蒙陰人徙淄川會
王父柳溪先生汝登德行稱於州里王父中丞公
舉萬曆庚辰進士巡撫浙江都察院右僉都御史
父所翔光祿寺署正君少有名場屋順治甲午中
山東鄉試康熙丁未舉禮部時君羣從兄弟方貴
盛人謂可驟躋華膺君笑不應躡屩五百里止海

上二勞山究道德參同之旨著放言集平生忼慨

盛人謂可驟躋華廡君笑不應躡屩五百里止海

上二勞山究道德參同之旨著放言集平生忼慨
重然諾其師孫文學逋官糧立解裘贈之同年長
清董君有弟役旗下脫左驂代贖直白金他如董
政鄒昇霄張思泰輩所焚券不可訾算撫孤甥王
超安克類外弟王之駉自髫髻迄成立里鄙誦義
焉又嘗出私錢葺文昌祠修龍虹橋置義學義田
其樂善不倦如是平居教授生徒多成名士登甲
乙科數人子之駟亦舉省闈其訓駟之言曰吾家
自柳溪公發畏天之學中丞公敬承之家始大汝
祖汝父率由罔斁以有今日人亦有言從如升堂

違如赴壑戒之哉人以比唐華原柳氏君之歿也
白頰更黑人以為異生以天啓辛酉二月二十三
日卒以康熙二十三年甲子十一月十五日年六
十四配韓氏淮安府同知競秀女天性儉素終身
無金翠文組之飾撫諸姑遺孤皆時其婚嫁嫁兄
女五人無異己出人以為難生以天啓癸亥二月
十一日卒以康熙十七年戊午閏三月二十一日
年五十六子一人之駟康熙甲子舉人女子二人
一適唐夢師一適張倣慶孫四人肇修太學生肇
儂肇仕肇俸曾孫一人光緒以康熙二十五年九

月一日葬淄城北之新阡銘曰

儷肇仕肇俸曾孫一人光緒以康熙二十五年九月一日葬淄城北之新阡銘曰
以天地為濶廬深味道腴其山澤之癯耶其列仙之儒耶

容城縣教諭趙君墓誌銘

君姓趙氏諱明徵字哲公其先吳人也明初以軍功世襲錦衣衛曾祖輅歲貢生祖光遠以醫名明神宗朝為侍直始籍大興父士通精於易著易圖說學者稱潛夫先生有三子君季也君自束髮出語即驚其長老閨門孝友人無間言尤重交游然諾潛夫先生慕沈青霞之為人學其畫梅往往奪

真然頗自祕惜一日寫一枝於縑素自題絕句云
桃杏色相別李柰性不同一發寒香後四子稱下
風以授君君受而藏之益自刻厲執經於藁城彭
進士三益而與宗太守彛宋戶部翔為友甲申逆
賊李自成犯京師君扶母胡太孺人抱姪於篋避
臺溪廠太孺人坐淺水中曰急則就深死一賊馳
馬過之君以身翼母而蔽篋於右腋賊射君中胸
太孺人倉皇欲投深淵君忍痛拔矢曰兒無恙也
力持母起匿他所以免鼎革後潛夫卜居濟南顧
謂君曰吾東西南北之人也顧西山丘墓在焉子

歸矣其代我伏臘祭祀勿缺君於是獨歸京師奉

謂君曰吾東西南北之人也顧西山丘墓在焉子

歸矣其代我伏臘祭祀勿缺君於是獨歸京師奉
祀事歲時集諸父昆弟祭畢而觴曰吾有親而離
居為祀先也後之子若孫日即於疏祀或不畢集
憂喜慶弔或不相往來合族之義其謂之何嗣是
修祀事唯謹族用敦睦潛夫有兄士美業岐黃老
而貧君構室備藥物家具以娛其老如事潛夫先
生友人劉國亮貧士也病且死泣謂君曰吾母年
七十吾又無子天乎奈何誰養吾母者君撫之曰
吾與君為友子母吾母吾在子何戚即子不言吾
已心許之古人不忘夙諾尚挂劍墓樹而況託子

以母乎劉死君葬之養母於家終其身以是君孝
義之名聞都下順治甲午與兄吉徵同舉順天鄉
試明年不第省父母濟南丁酉遊江寧病卒年僅
三十有七君卒後部選得容城教諭元配潘氏繼
配楊氏苦節三十年撫孤子于京于蕃皆成立巡
撫中丞疏聞於朝奉旨建坊旌表君可以含
笑入地矣君生以天啓辛酉正月十一日未時卒
以順治十四年丁酉四月十六日辰時子三人于
京康熙辛酉山東舉人于申早卒于蕃廩生女子
三人長適房俊次續嫁皆卒次適翰林院侍讀蕭

君惟豫孫二人鶴禎鼎祺以康熙己巳閏三月初

三人長適房俊次續嫁皆卒次適翰林院侍讀蕭
君惟豫孫二人鶴禎鼎祺以康熙己巳閏三月初
九日葬濟南玉函山之麓銘曰
骨肉復於土魂氣則無不之朝乘回風暮載雲旗
裴回乎西山先靈是依

文林郎內丘縣知縣吳君墓誌銘

君諱瑄字舜玉別字西濤其先棗強人也明初從
濟南之長山曾大父文魁永平訓導大父三戒吳
橋教諭識范文忠公景文於諸生終階州學正父
凱縣學生贈文林郎平順縣知縣母沈氏封太孺
人君生而朗雋為諸生好任俠已然諾交遊甚衆

家雖貧廓落有大志常慨然慕季布劇孟之為人即有急赴之甚於己私昏夜叩門未嘗以有無爲解故人人樂與之遊年二十名已在諸公間矣戊寅遭文林公喪濟南被兵君奉母奔遊山間造次不廢書順治辛卯中省試己亥成進士丁未除知平順縣縣在太行山谷中無桑麻絲枲之利君行田見山多榭樹曰是可蠶也自其家移蠶種教民以收養繅織之法踰年人食其利縣磽确乏水泉祇二井隸官民汲十數里外君為鑿池二各廣百步清冽而甘居人便之鄰縣大猾某犯法詣

關投匭部下之郡無敢窮其獄者上官知君才以

百步清冽而甘居人便之鄰縣大猾某犯法誦

闕投匭部下之郡無敢窮其獄者上官知君才以
屬君君毅然繩以法絲髮無所貸其任職有心力
皆此類居二載遭太孺人罍服闋壬子除知內丘
縣地當子午君為治視平順而加詳密以暇日修
學宮進諸生與論文藝有杜異芳者負士也君憐
其才推挽之成名士會滇黔告變羽檄旁午未幾
病卒乙卯內遷需次歸濟南病日甚以戊午十月
卒君事太孺人有茅容之風其初中省試也太孺
人撫君而泣君亦泣平居出告反面如孺子予每
往來君家習見君所為如是未嘗不太息交遊無

貧賤富貴終身不易為孝廉時師事故太子太保
大司寇李公李公卒哭之盡哀在內丘日聞劉鶴
林中丞先兄西樵考功之訃適有公讌為流涕罷
酒父母之器致車千兩平生赴人阨因為友人撫
遺孤甚衆未可一二數亦不自伐以為德也太史
公曰緩急人之所時有也士窮窘而得委命此豈
非世之所謂賢豪間者耶君抵掌談笑往往鄙鄉
曲之儒抱咫尺之義姝姝煖煖自名聖賢之徒一
旦有緩急舉世無足恃者故自其少時任俠自喜
欲以矯流俗之所為而兩仕終為令不及大有所

表見噫其可悲已君生以天啓辛酉十二月初七

欲以矯流俗之所爲而兩仕終爲令不及大有所
表見噫其可悲已君生以天啓辛酉十二月初七
日卒以康熙十七年戊午十月二十五日年五十
有八娶安氏封孺人繼劉氏耿氏封孺人章氏子
三人長榮長源長城女三人適李有之王啓沉李
斯比孫二人弘勳弘協以某年月日葬某阡銘曰
俠耶儒耶千里誦義而家無儋石之儲耶仕終百
里利劍而以拄車耶萬年之藏在此墟邪

葉母張宜人墓誌銘

康熙戊午黃州葉君井叔以博學鴻儒徵留京師
其妻張宜人歸武昌明年井叔報罷南歸宜人已

前歿於是并叔哭之哀以書抵其友濟南王士禎
俾誌墓中之石予讀之棖觸而悲昔吾妻張恭人
之歿予在京師恭人且死恨不及與予相見數顧
視牕間日景因嗚咽流涕覆面今并叔悼亡之悲
與予同其情事又同語云悲者不可為象歎予於
宜人何能已於言哉按狀宜人姓張氏吳之常熟
人父凌虛翁雲鳳母陳氏凌虛翁為廣濟典史免
官僑居武昌之樊口而并叔之父錦林先生亦籍
吳之嘉興官黃州衛經歷因相與為婚姻癸未闖
獻二賊交誼於楚闖賊別將陷黃陂巡撫何公騰

蛟檄先生往攝縣事已而獻賊陷蘄逼黃州并叔

獻二賊交誼於楚闖賊別將陷黃陂巡撫何公騰

蛟檄先生往攝縣事已而獻賊陷蘄逼黃州并叔
奉母太宜人渡江至武昌依翁以居黃州陷翁攜
兩家老弱走樊湖賊舸踵至宜人遂與父相失乙
酉先生遷知永明縣尋棄官湖居憐宜人之賢謂
太宜人曰此凌虛翁愛女也今其家凋喪至此藐
孤為吾家婦當善視之宜人亦婉嫕柔順能得翁
姑之歡家貧屢空闕甘旨然菽水菜羹必自烹飪
而敬進之事太宜人十有一年始終無間年饑往
往采藜藿噉糠覈別以小罌為飯進太宜人而已
嘗不飽太宜人患喉痺時天大雨雪并叔阻異縣

宜人朝夕侍命長子道復披冰雪求藥草療之卒
不諱則擗踊哭盡哀歲時伏臘追思輒泣涕不已
其孝敬如此井叔為諸生館里塾宜人有兩子一
女紉箴澣濯舂汲炊爨皆自為之順治辛卯井叔
下第歸宜人泣語曰君之貧極矣姑暮景望君成
名亟矣曷勉之丙申春正月井叔將赴江夏謀食
於故人夙興待旦坐地爐間寒甚爇茅柴啜粥仰
天喟然曰天乎曷俾吾妻孥少免飢寒不至此極
乎因泣下霑衣宜人曰君不嘗稱昔人牛衣之事
耶兒女雖凍餓未嘗敢告瘁以傷君心君何不自

激昂而以咫尺之見墮志為井叔起改容謝之丁

耶兒女雖凍餓未嘗敢告瘁以傷君心君何不自
激昂而以咫尺之見墮志爲井叔起改容謝之丁
酉井叔中省試時太宜人已歿捷書至井叔泣宜
人亦泣己亥井叔成進士除延平推官宜人偕之
官久之改補登封知縣稍遷兵馬司指揮宜人居
恆以毋忘貧賤時相勉故井叔所至潔廉慈惠有
循吏聲丁巳井叔遷主事需次京師明年被薦
召試宜人以九月歸楚次明港驛而病絕復甦歸
數月幼孫德滋紹孫貽孫女孫鴻兒相繼痘殤宜
人屢哭之慟病復作遂不起康熙十八年十一月
十五日也先是宜人食貧時常有嘔血疾及之延

平又患氣痛歲一二舉發至是增劇彌留之際願諸子女歎曰嗟乎我與而父共甘苦三十七年今已矣不得復面矣淚下如綬縻既屬續目猶視諸子女哭慰再三始瞑嗚呼其可哀也宜人生以明崇禎戊辰距其卒得年五十有二初封孺人進封宜人子男二道復武昌縣學生道臨附例監生女子二適王一鯤楊廷燕子與井叔以道義文章為友交誼近古稔知宜人之賢而以貧病憂患終其身尤有足悲者為略其德與言之槩如此冀以慰吾友且以慰宜人於地下銘曰

生於吳葬於楚婿於姑舅克相夫子由困而享胡

吾友且以慰宜人於地下銘曰

生於吳葬於楚媵於姑舅克相夫子由困而享胡
不偕老樊山之陽大江之澣佑爾後人百世无咎

帶經堂集卷四十七

